

四庫全書

集部

欽定四庫全書

懷麓堂集卷四十六

明 李東陽 撰

文稿二十六

誌銘

明故榮祿大夫後軍都督府同知芮公墓誌銘

公諱成字仁和姓芮氏其先出大同之金山祖諱達布哈元翰林學士承旨父諱博羅魁岸多智歸我聖祖暨

于文皇官至燕山左護衛正千戶千戶公之卒也太夫  
人富氏已娠越三月生公既長而蔭芮祀賴以不絕矣  
公性明閭閻騎射正統甲子從恭順侯吳公北征擒敵  
人哈喇岱擢金吾左衛指揮僉事戊辰使衛喇特還進指  
揮同知己巳復使衛喇特窘迫備至不受敵撓是年秋英  
廟北狩公冒矢石得停鑾所在景泰間還京師繫詔獄  
未幾見釋進指揮使甲戌征銅鼓諸蠻累功擢都指揮  
使英廟復位念公舊勞特擢驃騎將軍後軍都督僉事

公統効武營命入朝侍衛賜蟒龍金鎧兜鍪天順辛巳  
曹賊之亂公名載功籍進榮祿大夫都督同知賜以誥  
命贈祖父及考皆如其官祖妣某夫人妣富封太夫人  
成化改元受命出鎮川蜀征山都掌招徠蠻酋以靖弗  
庭焚山獮澤誅勦無筭捷聞進右都督賞賚甚厚居數  
年與都御史交効復以都督同知罷鎮還京師癸巳復  
以兵部薦命統禁兵入衛如故又三年成化丙申四月  
二十五日乃卒年六十有七朝廷遣官諭祭命有司治

葬事嗚呼公以遺孤起家千戶遂陟閫府歷累朝五十  
餘年內領宿衛外勤征伐使絕域鎮遠疆茂著勞効老  
而不懈可謂不忝厥祖矣子男五長昕次昂次某某公  
子昂以次當嗣卜以某月某日葬公通州富豪鄉欲得  
予銘乃以吾友曾吏部克明狀來請公嗜書史不近酒  
恂恂如書生蓋天性然也予得之吏部云銘曰芮家西  
裔世勤帝家赫赫先公爲國爪牙惟公桓桓忠腸義肝  
北縛彊胡獻馘軍門奉使出辦雄詞海翻頓撼擊撞愈

屈而軒有勤厥艱其倍百千人之逢時有屈而信先帝  
眷公云亦勞止置之後軍俾統予士我皇載命于蜀之  
鄙維蜀之鄙寇來如蟻公秉鈇鉞公奮弓矢招柔禦強  
陽開陰弛鉤雷迅颺瞬息千里何以錫公金鏐文綺何  
以報公俾督戎紀彼盈莫居載蹶而起惟公功名克與  
終始公門巍巍公嗣累累既紹永緒亦懷令儀我銘公  
幽百世不隳

明故封承直郎南京吏部主事潘公墓誌銘

東陽因吾友潘君時用獲見其族父興化君又因興化君獲聞其考善齋公之行則歎曰潘氏其可謂世德也已潘本杭族五代時徙括蒼今爲處州之青田代有顯者曾祖諱臺仲祖諱子山父諱鉞生公公諱沆字克明善齋其別號也公少涉家難避地農家得春秋左氏傳讀之終身不忘既又益涉經史尤深陰陽諸家書公父之戍雲南也公時尚穉有以父書致者公從從兄湛往見默不作一語其兄以爲不慧易之公退乃獨往跪且

泣問起居狀甚悉歸血指寫書附之其兄聞之曰彼非  
吾所測也公傷父死難書警語于日所出入以自屬每  
哀憤涕泣入則強語笑以見母不傷其心冬夜潛以身  
溫母被母詰知公所爲慰止之後將寢必鎖其室公竊  
鑰啟室母輒遽入止之母疾革公憂不知所出潛剖左  
股肉內糜中以進居喪哀毀幾絕貧不能葬然賻不義  
致輒辭弗受墓無廬舍巢于樹以居過者皆佇視感歎  
曰真孝子也興化君舉進士嘗以南京所給半俸屬其



友項司務文祥市二幣以獻公公怒曰汝始仕何自致此物是豈吾爾望者君數書自明實所得常俸不敢用非義爲辱公猶未解至以項書及故緘報公公乃信君既拜南京吏部主事今天子登極上皇太后尊號以恩封公承直郎南京吏部主事配王氏安人命下未至而公卒是爲天順某月日年八十有四某月日葬釣臺岡先塋之左王安人雲和世族孝謹有淑行兩就官養自興化歸卒于家爲成化某月日年亦八十有四以丙申

正月二日合葬子男三長權先卒次琴興化君也累官  
至知府博學高行爲時名人次核出繼仲父海孫男琚  
早世次珙瑄瑣玘瑚公葬未有銘興化君來朝京師以  
趙荊州士英狀屬東陽曰某礮石山中久矣俟吾子銘  
追而內諸壙既行道聞王安人訃棄官歸治喪信來速  
銘謹按銘法考公行得其大者如此又聞公多才畧閩  
賊之亂諸郡瓦解賊據沙嶺銀冶守臣調濕州兵三百  
守沐溪縣吏集鄉兵數十授之公謂衆曰賊衆我寡宜

任計不宜任力澄照僧自間道來受役宜用爲鄉導引兵  
向華山前鋒人持一木鳴鼓以進擇地爲戰建標山巔  
緹籠燈其下伏兵于隘以伺賊賊至勿鬪列木距馬出  
礮矢以衝其鋒鋒少挫其勢必走走且半則揭燈起伏  
腹背夾擊當無遺者衆莫肯信後官兵果敗鄉里大擾  
三載始定皆如公言銘曰體以親故寧毀弗顧君子不  
敢以爲過貧以義守寧棄弗取君子不敢以爲矯公德  
實希公執不隳吁嗟乎今誰與歸

明故懷遠將軍錦衣衛指揮同知趙公墓誌銘  
錦衣衛指揮趙公病革家君往視歸謂東陽曰平生故  
人如邦彥者三十年如一日可多得邪去年邦彥與吾  
論舊故凋落殆盡在京師者惟吾二人因對酒太息泣  
下今邦彥又舍我去吾何以爲情耶是日公卒家君往  
哭之明日東陽既往又明日公弟錦衣衛鎮撫恭來請  
銘家君乃命作銘公趙姓諱能邦彥字也始代世官爲  
金吾左衛指揮僉使事繼領禁衛兼隸三千營典中軍

旗纛每退朝在步輦前導器宇魁岸英廟目屬焉天順  
辛巳公以營籍從征廣南時懷寧侯孫鏜實總禁兵別  
置官代公一日上顧問左右曰彼長身荷爪者安在鏜  
以實對上怒責鏜曰此朕禁旅安得妄動鏜謝罪乃免  
亟馳驛召公追至九江而還乃黜代者仍公舊任蓋有  
意用之未暇也甲申今上登極公用兵部薦調僉錦衣  
衛出入慎肅上下倚重屢奉勅旨其在都城督官糶修  
城垣總中外衢巷隍塹諸水道事事並告集人亦弗擾

其在外藩勦晉趙二獄趙獄尤重連結寢廣公覈情據  
法刑用不濫法家體之丁酉夏五月上念公賢勞特擢  
指揮同知數月卒公在官久宣召扈衛輒先貴近累賜  
中秘書寶鏐文綺蟒龍佩刀諸時物無虛歲卒之明日  
適賜蟒服中使已出聞公卒乃返上特遣官諭祭亦異  
數云趙氏本永平遷安世族曾祖諱才興肇著戎籍祖  
諱甫疾不任事以從子某代累官至副千戶戰死齊眉  
山無子甫復以諸父繼用死事功遷指揮僉事考諱榮

代以恩遷同知既老致仕復以恩進階昭勇將軍累錫  
誥命妣李氏配張氏皆封恭人公涉書史閑武事家居  
孝養喪祭無違禮與亡弟義官廉及今鎮撫恭甚友廉  
卒撫其孤如存時教子有法子魯侍儲衛游武學有名  
家風孫男四皆少俊可愛人謂公有後矣公生某年卒  
某年年五十有七葬昌平北望祖塋之次銘曰物貴重  
厚於人亦然有跼必顛峭則弗完公居錦衣十有四年  
持盈居寵不替益虔功名始終孰謂弗難生榮死嗟道

路有言人之毀譽不繫其權我辭或傳公死弗諉

文永嘉妻祁氏墓誌銘

成化丁酉秋九月文君宗儒使自永嘉緘書狀各一道  
抵予其書畧曰吾妻卒于蘇州林將以覲事北上歸道  
蘇且葬之已卜地于吳縣之藏金灣以明年三月某日  
從事請吾子銘其狀畧曰吾妻姓祁氏諱慎寧吾鄉祁  
彥和甫之女年十九始受聘比歸二十有二時吾母棄  
養也久事吾父及繼母祇畏不懈食飲衣服必其手出



家或致饋餉輒辭曰私饋非長者奉又不可獨啜將焉用此林出就學吾妻脫簪珥爲筆札費及舉進士從上京師或謂其服食太朴者則曰吾儒家婦也固當爾且仕固亦以榮其家然鮮不以妻子之欲爲身累累其身以及其家如親何吾爲婦無他能不以口體累丈夫耳已而從官永嘉俞肅家政二子一女雖幼穉不遣窺外戶故林得盡力于官三年無內顧憂林之在永嘉也念家君宦遊北方不得共朝夕圖迎養于家業未就無

以爲計意時時不樂吾妻謂林曰君在官巡不得顧私  
養養吾責也請以二子歸治舊業爲迎養地林感其言  
遣歸未幾得疾三月二日卒年三十有二而已又曰婦  
人而得正首丘彼亦幸矣然舅姑及夫皆遠處南北圖  
養未遂竟以別死此其志亦可悲也予與宗儒交讀其  
辭意不能無戚乃次第爲序并繫以銘宗儒多才有文  
辭出宰鉅邑爲兩浙稱首行且有旌錫之命命未及故  
于茲墓獨書曰文永嘉妻云銘曰勤儉而專婦之恒兮

胡殫厥身而隕其成兮匪夫君則賢其誰使我銘兮

明故封承德郎戶部主事陳先生墓誌銘

景泰初東陽以童子奉詔入順天府學爲諸生時益都  
陳先生寔分教事殊見優遇俾得月朔望參謁不與諸  
儕輩同朝夕東陽既與先生子清同舉進士在朝籍先  
生歷他郡歸田里不相見者餘二十年而竟不可作矣  
清歸自大同還京師屬銘嗚呼先生之德東陽不敢忘  
聞訃哀悼惟不克弔哭門下是憾銘吾職也其曷敢有

讓先生諱俊字廷傑其先臨川人國朝洪武初大父諱  
有才避兵青州因留居益都父諱某不仕先生少岐嶷  
以諸生舉正統辛酉鄉薦再上禮部得一科拜晉州訓  
導丁內艱去改順天令九載奏績翰林試經義吏部覈  
所舉士皆應格書上上考擢河津教諭復以外艱去改  
交城清拜戶部主事既考成績先生乃棄官就封封承  
德郎戶部主事家居十有餘年及見其子爲郎中乃卒  
年七十有二先生性質實耿耿不阿事親孝家雖貧猶

歲析所入俸爲養喪居毀瘠兄弟有異論諭不能得取必以讓鄉論歸之教務經術程式不弛然辭色溫巽即之盎然可親其所造士領鄉薦者十餘人又多舉進士有名績清尤勤慎有聲上下間蓋得諸家教尤多初先生在一科同進者多不屑教職至匿年規免或謂先生先生不應卒無愠色比老竟得顯錫又耆壽多賢孫子造物者固有定數人顧以私智毆之奚益哉先生生某年沒某年葬某原銘曰安其瀦斂其有餘慶源所儲于

厥身于厥子孫其流若奔吁嗟先生其永存

賀感樓先生妻王氏墓誌銘

東吳感樓賀先生美之喪厥配王氏且葬自述事狀遣其子鄉貢進士恩上京師曰爲我徵太史氏銘先生未嘗面予得予文輒爲終卷嘗聞諸吳士大夫恩曩在京師亦嘗道先生意如此銘不得辭按狀王氏諱正江陰農家女也賀本吳人感樓之大父大理評事諱賢尚爲江陰訓導留居江陰洪武間坐事死役子宗震纔八歲

貧無家依女兄及舅氏比壯贅青陽鄉之薛氏王薛隣也故感樓聘焉時宗震復坐累籍蘇州衛爲兵盡鬻其田廬家益貧感樓壯不能娶婚于王氏王氏亦貧甚止餘空屋三四楹兩家食常絕殆不能朝夕感樓乃奉母及妻還吳僦屋以居感樓貧居能力學博涉書史自其初爲童子師從者日衆歲時脩帛頗足共饘粥儉不妄費稍懋遷爲業銖存兩積積且富益儉節如貧時累四十餘年闢畝崇屋給婚嫁爲富人時感樓學已就爲鄉

先達子思舉南畿鄉貢第一有名而賀氏益根固感樓  
所力致而經營拮据籌贏縮籍出入俾無廢闕者王氏  
力也成化戊戌思歸自京師王氏老且疾己亥二月五  
日卒年六十有七矣感樓之言曰吾妻無他異能獨吾  
貧時恒不免凍餒吾妻未嘗有怨恨色吾衣食才足吾  
妻不爲侈不異其貧吾弟不克自給又多子女吾妻能  
順吾意常給予無恡色吾平生不信佛老及陰陽拘忌  
吾妻亦遵用家政不吾拂也於戲貧能積積能守又能



散逸塞困滯而不以流俗敗家法此皆人情所難况婦人哉子四某某孫男某某某月日葬吳縣先塋之側其地曰某原銘曰昏不禮迎其變也正有封在原其歸也全孰艱厥生孰壽厥死委身其間與命終始夫爾託之子爾續之幽堂有銘太史作之

明故奉政大夫修正庶尹河南按察司僉事尹

公墓誌銘

嗚呼公之葬有日矣匪予小子曷宜爲銘公於東陽爲

師爲父執爲鄉先輩亦奚忍爲公銘然非東陽誰知公者公尹姓諱進字時勉揚州江都人考諱某從戎府軍居京師家故貧公力學自振聰穎絕人書一再過輒成誦友有春秋秘義假者不能得則以屬公公往與奕間一閱已復置案上歸輒錄授之數日而畢景泰庚午公以父役應試用書經舉順天鄉薦登天順丁丑甲科拜戶部主事京庾有歲穀甚夥掾吏窮日夜計總目以呈公尤精算事一布籌輒取筆判曰差若干斛掾不服公

教以捷法爲部位使覆計之果然中官共事者駭服乃一聽公所爲莫敢扼聲籍籍起儕輩間數年用吏戶二部薦擢河南按察僉事領南畿江北屯田事事不稱力公嘗曰今官患冗如河南某事某事皆專置以吾攝之足矣巡撫官知公才欲使鬻河南麥于淮以利官需公謂非國大體且未必利畫一以陳再駁再上辭氣剴切文義燦然巡撫亦名士得公議夜不能寢然亦竟不行又有巡撫官欲薦公數年公言藩臬間有謂公者公愀

然曰使某可薦則某不得與聞不可則不必言也巡撫亦竟薦公不報公九載成績當受遷別其寮曰我休矣入京移疾竟不至吏部或勸公出公曰吾蚤喪昆弟長子又死使吾生行死歸亦焉用彼爲哉蓋自河南已爲是言後愈執不變還京居室甫定僅二載而卒論者皆歎公之先幾云公風裁清操論議鏘聳重名檢尚意氣子視孤姪曲致恩義不遺故交不陵小官自鄉黨寮屬無大小疏戚同稱爲賢以公之才視天下殆無不可爲

者而竟止是嗚呼其尚忍言哉公子一某生某卒某東  
陽往哭又三日乃克銘十有九日執紼而從公于墓其  
地曰某村在京城東八里銘曰嗚呼先生有位與名不  
損厥盈于身則羸履艮于亨澤壅不行豈材弗能已焉  
哉嗚呼先生

明故封徵仕郎中書舍人劉公墓誌銘

公姓劉氏諱英字某永平遷安人高祖諱明道元禁軍  
萬戶曾祖諱源祖諱允恭考諱麟隱居國朝洪武間有

司薦茂材以親老辭不獲至京師辭弗就任忤旨編籍  
錦衣衛校尉行役使廣東公失怙甫七齡無他昆弟以  
例紀錄于官弱歲乃就役事母溫曲致奉養出值嘉果  
必懷歸遺母或遇諸市囊無錢輒解衣質之母病籲天  
請代病遂愈孝稱其鄉尤重信義有張姓者貸不能償  
以女自贖比還鄉別女有難色公亟命還女并衣褥予  
之有喪不能舉者出求賻不得公聞之遣人覘其家餽  
以金帛其人驚感問姓名不告也公恒曰吾蚤志問學

中縻世務吾子孫必有成吾志者指其子詢曰其在此乎正統己巳八月公扈從北征歸被創疾甚十有一月某日卒年五十有二詢既貴贈公徵仕郎中書舍人封其配龔氏爲太孺人太孺人應天鉅族處士某之女也明淑精女藝及歸公躬執饋饗尤虔祀事事夫無倦色公之疾也焚香籲天如公事母時公卒諸子俱幼太孺人力襄事舉無違度教子必申父訓夙夜勤瘁以享其成蓋尊居樂養者三十餘年年八十有二乃卒子四人

謹讓詢諮詢歷官鴻臚序班中書舍人今爲禮部主事  
直文淵閣公既卒葬城南三里河下馬社之原太孺人  
以某年月日合葬未葬十日詢具衰經奉狀詣予拜且  
泣曰先考葬無銘今吾母將合葬銘禮也詢不敢廢且  
懼潛德卒不白以重不肖之辜敢請太史氏銘予惕然  
感之乃爲作銘銘曰都城之南原有穴公歸百里蛻汝  
骨山渾水靈閔不洩如木斯植久乃發神其相之若有  
物公有令婦德與匹遺休在躬保終吉後三十年歸此



室


明故封翰林院編修文林郎謝公墓誌銘

吾友謝君鳴治既遷翰林侍講念親老欲歸省于家顧  
爲編修時嘗一歸近制非滿十載者不得告居常鬱鬱  
至夜不能寐今年期且及方具疏未上而文林公之訃  
至矣東陽辱鳴治爲知己非苟涉欣戚者既走弔歸爲  
不寧寢食者數日吏部郎中黃君世顯狀公行以鳴治  
子興穀來徵銘東陽未獲拜公每從鳴治得言動狀知

公長者今已矣是惡敢不銘公讀書識理道承家世孝  
節志圖不辱母趙節婦之寡公甫晬旁無伯叔兄弟稍  
長克自奮立禮扞外侮屹然不爲動節婦懲財召禍盡  
散貲產家就落公畢力致養厚治喪祭人不見其貧有  
嚴勝者感節婦之義後死不貳公禮事終身爲義服且  
祔祭之曰我子孫世世無忘嚴氏公自奉數儉雖被封  
錫祿食僅足益自節縮爲義舉從弟世修以寶慶知府  
致仕家居公與建會總亭于曾祖孝子墓側墓祭已則

立子姓讀所著宗範其中歲置敦彞會以合族別建祠  
堂于新第之東置田若干畝以共祀事於是謝氏之孝  
義隱然動鄉邑大夫士聞者咸相與慕悅爲歌詠傳於  
時謝氏世居台州黃巖縣南孝子諱溫良始遷桃溪桃  
溪今分隸太平則爲太平人公祖諱雍考諱乾公諱脣  
字世行別號見南居士封翰林編修階文林郎配高氏  
封孺人有內行子五長鐸鳴治字也次某某公生某某卒  
某壽六十八初公考葬洋畧山公顧其右偏曰死葬我

於此鳴治歸卜用某月某日窆焉銘曰孝子錫類允惟  
謝宗歷世中微其蕃衍自公公生亦艱孑立靡怙孰畀  
全之公有貞母公壽且貴五子十孫天謂弗徵視此後  
昆福有幸致利有苟射令名之下可以觀德



懷麓堂集卷四十六

欽定四庫全書

集部

懷麓堂集卷

四十七至五十

詳校官監察御史<sub>臣</sub>范衷

中書<sub>臣</sub>劉源溥覆勘

總校官編修<sub>臣</sub>王燕緒

校對官待詔<sub>臣</sub>胡士震

謄錄監生<sub>臣</sub>劉淡

欽定四庫全書

懷麓堂集卷四十七

明 李東陽 撰

文稿二十七

誌銘

金尚義墓誌銘

成化己亥閏十月七日金君尚義卒於遼陽庚子三月其子  
祺祐道京師翰林侍講謝君鳴治率諸同年為文寓祭其喪

六月祺以喪歸至天津復走京師從順天府經歷薛秉義來請銘予比與鳴治悲君之死期各為文以慰君地下鳴治既為傳子撮其大者為序及銘君金姓諱忠字尚義處州麗水人乾州知州諱善之曾孫封文林郎監察御史諱叔度之孫雲南按察僉事致仕諱愷之子開封府知府致仕尚德之弟少從按察公宦遊廣東甫就學輒棄去商販蘓松間年二十見其兄舉進士復奮就學補雲和縣學生數年應貢升國子生天順壬午舉鄉薦甲申登進士第會修英廟實錄奉詔往



應天太平寧國徽州諸府採錄事蹟還簡試御史事於  
南京丙戌拜貴州道御史未上聞按察公喪歸又喪母  
高宜人哀毀踰禮庚寅服闋上京師即上疏陳三事皆  
人不敢言者復除南京值星變復具疏將上言愈切開  
封君作東甌童子篇遺之乃止巡盜上江抵南康諸府  
法尚嚴肅沿江諸司各置紙牌藉兵尅期更相考覈俾  
往來江上無虛日盜不敢肆監南京內帑諸衛倉及象  
馬諸草場吏卒傳相戒曰勿犯金御史攝雲南江西山

東三道事劾大臣不任者一人三載考績道得鼻衄至  
南京移疾不視事因圖為去計會臺檄遣巡盜蘇松諸  
府君辭不往都御史胡公敦勸之乃行人謂君法大重  
執不變有為君所按者誣君事上奏遂逮捕君君聞命  
命以妻子屬其友陳御史直夫曰吾不免矣自往就逮  
入錦衣衛詔獄獄成特命戍遼東三萬衛君談笑就道  
意慷慨如平時至遼杜門謝客有達官問所欲君謝曰  
此正某平生所不敢為者居六年聞開封謝事遣祺歸

省病卒時諸子皆不在側家人以冠帶服君君已不能  
言但搖首至再易深衣乃一領而絕年四十有八君娶  
周氏生祺及祐卒贈孺人孺人卒時君葬諸文林公墓  
側且自為壙謂開封及第某曰祖壠不祔懼我兄弟之  
後將日疏矣俞孺人既返葬之六年君葬焉卜以某月  
某日君性剛斷負才氣見義無所讓同邑進士吳榮卒  
貧不能舉君合賻治葬又贈所粥田若干畝遺其家貢  
御史壁道死君具棺歛歸其喪南京致賻以行遼有兄

弟相仇者君諭弟辟兄及貧急又賙之所著在官有甕  
天稿三卷在遼有東甌童子吟稿三卷廣惠集方一卷  
藏于家初祺方娶十日聞父難亟來赴及君被謫兩上  
疏乞代父戍不得比歸自遼自為狀述君事甚悉鳴治  
嘗謂予曰尚義有子矣銘曰義以為塗帥氣以馳視險  
若夷勇不自持謂我好名我職在茲我身弗卹而以名  
為人才實難必先大節壯哉金君其死不減

明故正議大夫資治尹工部左侍郎王公墓誌

銘

工部左侍郎王公歸老衡陽至南京病甚泊上新河留  
十日卒于舟中其子恩扶櫬歸訃聞上遣官諭祭命有  
司營葬事進士羅監緝熙實奉部檄入告成事恩寓書  
緝熙請銘公墓東陽鄉後進辱公禮遇久矣銘曷敢辭  
按恩所述事狀王氏出吉泰和始祖萬莊從父某守邵  
陽居衡陽長平鄉遂為衡陽人曾祖某遷鳳山祖某考  
諱仕復世有隱德公諱詔字伯宣少警敏讀書目數行

下宣德乙卯領鄉薦正統戊戌舉進士奉使雲南大同  
乙丑授禮科給事中丙寅充韓府冊封副使己巳之變  
與諸科合章劾將臣失律者及敵薄都城公將官軍民  
壯為扞禦計事平上疏請旌死事罰失守及不赴難者  
時國家多事章奏繁劇動數千百言大要皆扶忠抑佞  
恤民防敵之務天順初轉兵科給事中給勅命進階從  
仕郎贈公考妣如其官未幾以內艱去壬午服闋復除  
禮科奉勅與兵部及監察御史簡十二營官軍遷右給

事中成化乙酉代祀北嶽歸遷都給事于時歲屢水旱  
陳弭災數十事多見采納天城衛指揮王輔甫弱冠邊  
將遣備寇西鄙坐失律當斬公言輔年少不當遣敗非  
其罪并其屬皆減死丙戌擢通政使司右叅議丁亥奉  
勅總易州山廠薪炭事興利去弊具有成績己丑擢工  
部右侍郎領職如故給誥命進階通議大夫贈祖原簡  
及考皆如其官甲午遷左侍郎入僉部事修內沼浚運  
河修國子監累賜羊酒楮錙惟運河功最劇特遣近臣

勞于河上者一于張家灣者再異數也戊戌九載秩滿  
命仍舊職加正二品祿是歲疾尋愈上疏乞歸不許已  
亥城中大水命浚治諸渠道復賜羊酒楮錫疾再作再  
乞歸上若曰卿慎疾自愛勉修乃職其母去公感恩力  
疾不敢復言歸庚子春方署事忽中風尋少愈遂力申  
前請事下吏部覆實乃許致仕令有司給驛傳陞辭賜  
內饌及楮錫為道里費時公卿而下祖餞都門外侈為  
歌詩至濫峯帙觀者皆交相歎羨稱為盛舉蓋在途閱



一月而卒八月十二日也壽六十有七公溫厚簡重抱負自許論民情國事亶亶不絕窮居事母必曲致歡適喜周卹居憂時值歲歉發粟數百石婚葬不舉必為經畫不俾失所友人王布政汝霖卒於官遺其二子為縣諸生家教尚肅嘗取祖考所著家訓三十六條篆諸梓建崇本堂歲時會羣族姓講讀其中尤勤戒飭不使預州縣事平生所著牋表奏議古文歌詩若干卷藏于家公居官儉素常俸外不問生業前後四十年田廬服飾

無增拓歸之日第宅荒落恩奉張淑人舟居歲周僦館城南以營葬事予聞之緝熙云張有賢行惟恩一子以陰補國子生質美而文銘曰古有嶽降世豈不神彼龐而奇吾識其人我冠垂紳在帝之側為少司空實掌山澤才恢罷閤公功亦隆公門巍巍與山為崇維山出雲雨我中士卒歛厥施寂寞可睹六十七年公歸于山有神不忘公在世間

明故奉政大夫兵部郎中喬君墓誌銘

成化辛丑七月十二日兵部郎中喬君卒于京師吾友  
中書舍人楊君應寧實君子傳著君狀君子宗宇特詣  
予請銘辭復請繼以泣竟不得辭按狀君喬姓諱鳳字  
廷儀太原樂平人也曾祖諱彬曾祖諱鑑歷湯陰平谷  
二縣簿有惠政俱贈工部右侍郎曾祖妣李祖妣李俱  
贈淑人考諱毅累官工部右侍郎妣王贈淑人公少穎  
敏五六歲時侍郎公口授尚書輒成誦終卷稍長落拓  
有大志從侍郎公使晉藩藩王愛君秀偉欲留為儀賓

君白侍郎公曰丈夫當自樹圖遠大安用此富貴為公  
笑曰吾意也事遂止景泰丙子君舉山西鄉薦天順丁  
丑登進士第時年十九觀政兵部庚辰授武選主事勤  
慎舉職成化丙戌遷員外郎未幾丁王淑人憂己丑服  
闋還官壬辰進郎中癸巳丁侍郎公憂丙申服闋改職  
方職方事加劇凡兵利害邊務當可否將材請任弗任  
朝省諮議時有裨益庚子奉使廣西時邊報頗數公重  
違曹署馳傳冒暑雨晨夕倍道不三月而還居一年卒

卒之年纔四十有三而登科第者二十有四年為郎中者十年官三命不越省吏部嘗擬陟尚寶卿不果欲議為藩貳久不決年資寢深諸曹正郎無歷君右者竟不及再命以卒君素孝養親疾視湯藥夜不解帶喪居哀慟前後扶櫬還樂平樂平山谷險隘或躬負輒紉塚雖官治親率傭隸至相為力庶母高死侍郎公之喪君慟視生母既喪守節白郡縣上狀詔旌為貞烈之門伯父老事之如父兄鸞早世撫其孤憲宣俾齒宦籍善交際

動無物迂徑直自信不甚為形迹尤篤故舊款洽傾倒  
至忘官勢故人無小大賤貴皆樂君為人卒之日皆悼  
有泣下者予及識侍郎公豐厚和易信為貴人見君翹  
竦繼出知公福澤攸在比於應寧數見宗宇皆謙謹篤  
問學宇尤穎異年十七舉順天鄉薦視君加少又以歎  
君之澤未艾也君配路氏封宜人子五宗縣學生宜以  
侍郎公恩為國子生宸寀皆幼女一聘金吾右衛指揮  
使曹壘卜用是年某月某日葬君長壽山侍郎公兆銘

曰貳卿之子為命大夫豈不能治弓而裘箕是圖天肖厥才壽則弗如將取之廉而委其有餘已焉哉喬君其澤弗渝

明故封承德郎工部主事徐公墓誌銘

兵部主事徐君源得承德公訃既為位哭服服如禮將奔喪襄事自著狀序世系行實請予銘按狀公諱某字公信姓徐氏蘇之長洲人也居縣東南之瓜涇有田甚良曾祖華二祖貴三考文質世以農隱故人稱瓜涇徐

氏公生十有五而喪父父喪之四月弟瑄始生公籍有世業奉母陳氏及育幼弟雖弱冠彊力如老成人父嘗教以六書九數之學久益精數法能目數行下宣德間詔中使通西洋諸域下州郡簡藝能士以從公用數為郡守所薦會英廟即阼不果行周文襄公巡撫南畿諏訪耆俊至無遺策得公喜甚凡財賦計出納籌畫皆見咨問公感文襄知己亦竭智力為之一時政事陰惠及民者為多文襄欲薦用公不果後繼文襄者數公以文



襄故不替禮接然竟無薦者公恒教諸子曰吾雖不仕  
頗自試然用吾粗耳必欲亢宗濟時非仕不可乃留宗  
子淵幹家蟲遣源及澄業舉子為郡諸生誨迪嚴甚每  
庭訓知源志嚮喜曰吾子孫當有為清白吏者源舉乙  
未進士拜工部都水主事分司山東三載考績進階承  
德郎以其官封公改兵部武庫凡八年于外公前後數  
十書皆先官誠後家務未卒之一月猶然公平居孝弟  
處家室白首無忤言治家勤儉凡田廬婚嫁創制經費

必親籍記名公大夫有嘉政善行亦手錄焉及在官尤  
慎密類為郡縣吏楷式者嗚呼公布衣為時用尚有德  
惠君子謂一命士可為物濟信夫公生某卒某葬某銘  
曰身不祿仕材則政謀老獲其名匪我自求天監實彰  
靡功弗酬矧直德者勤思有秋曷以喻公公農者流公  
有賢嗣出贊國猷澤則弗窮公有餘留公德不刊我名  
在正

樂亭知縣蔣原用墓誌銘

長洲蔣君原用知樂亭縣卒于官其友兵科給事中陳  
君玉汝為著行狀請予銘曰原用平生欲得先生文今  
死矣非茲銘無以慰地下且原用配徐涉書史文義惟  
銘是屬每泣曰妾獨不能如張圓妻子予嘗識原用于  
玉汝其亡可念念玉汝言辭至再不忍固也按狀原用  
姓蔣氏諱廷貴原用其字其先宋禮部侍郎堂守蘇因  
居長洲曾祖叔昂祖宗韶父惟清皆不仕母趙宋宗室  
裔也原用七歲失恃繼母鄒育鞠成之原用數歲能屬

對為韻語未冠通舉子義學易于進士奚君元啟游縣  
學有名成化辛卯舉南畿鄉薦為易魁戊戌舉進士觀  
政吏部授永平樂亭知縣方視事適歲大歉原用亟上  
疏乞減賦役什六七民恃以不徙王師征建州道樂平  
原用承部使檄總山海諸關驛車馬芻食事先令集縣  
故僻境部使罕至治率用苟簡原用舉廢治闕勸不愛  
力每貳佐出納必親衡量吏所具案牘必親校勘越一  
年凡地里邇遠民貧富強弱法令便不便皆可掌稽故

賦役獄訟動皆曲當歲所得常廩費不足則繼以家橐  
未常苟取人信其廉郡使至縣例有饋贈原用執不與  
或憾且謗之不為動縣治後舊有門吏出入無禁至通  
饋謝原用塞之會疾作不便者諷以陰陽拘忌不聽則  
傳以他說原用曰故令若某某皆死于是以不塞此門  
故邪且人孰無疾疾死命也門何預焉卒不聽疾再作  
再間治益力最後大作乃卒壬寅三月二日也原用和  
厚不忤物外斂圭角理辨內達遇事乃見始為縣或謂

其起富室宜不習吏事原用乃奮志倍力欲自觀其能  
不幸而死其志亦可哀也原用娶武功伯徐公女為配  
生女四人某某卒之日徐不能歸玉汝以書屬知永平  
府姜君璉治後事舁喪西上徐館南郭逆旅一月遺腹  
得男名之曰壽徐頗自慰忽罹火厄僅以子免原用之  
幼女死焉玉汝慟不置乃館徐于官邸遣其僕拾餘燼  
治裝買舟然後歸凡玉汝為原用謀甚悉君子謂原用  
交得其人原用先世長洲某鄉某原今歸葬以某月某

吉卜也銘曰位不必卿相稱則賢壽不必耄期名則傳  
為名進士為賢令尹吁嗟乎蔣君其死不泯

贈翰林院編修文林郎陳公墓誌銘

吾友翰林侍講陳君師召喪其考耕樂公及妣黃孺人  
若干年時葬未有銘師召既登第拜官歸省墓亦不果  
作蓋慎之也今年秋師召痛先德久弗識乃授狀屬予  
銘將寓歸用諸壙前狀故按察僉事楊朝重未第時作  
朝重公戚黨其述事行宜詳東陽師召同官厚且久稔

聞厥世銘宜予屬予亦弗敢辭公姓陳氏諱申字崇澄  
別號耕樂世居莆田涵江系出宋觀察使淬淬與金師  
戰急子仲剛死父難後淬亦死國事時旌其里為忠孝  
坊今綽楔翼然存焉曾祖諱仁祖諱德考諱光遠並有  
隱行公貌魁碩動履詳雅讀書曉大義喜談史傳少貧  
服賈事漁稼為養時曾祖妣及祖考妣久未葬公痛父  
志至或忘寢食及父喪益痛自奮積儉為贏畜乃并舉  
諸喪皆用禮葬人歎其難奉母林孺人養必備物病左



右侍夜假寐榻側聞謦欬聲輒蹶起母喪父值忌日執  
哀如初與弟戊友愛篤至世所遺田宅悉推予之復為  
共歲賦俾獲自裕每夢及父母晨興必告弟持抱痛哭  
以為常有女兄蚤寡教其孤二人皆底成立鄉居雍孫  
無競聲忤色人以貧告戚有施疏有貸貸亦薄息或竟  
以棄責嘗試長里賦賦不給寧為埤納不忍為培克四  
方賓客至日勤館穀有遠適貧不能行者必致厚贍值  
橋圯塗淖輒率衆力治之皆有成蹟可指數人德之至

今不良孺人黃氏世隣也閑禮度習書教孝養舅姑視  
外內族黨有恩誼儉不服紉綺見敗縷遺粒必躬拾之  
有嘉饌必蓄為客具及公有義舉雖重費不吝助之此  
於公德固大類教子尤嚴肅不溺私愛恒舉近世成敗  
子迭為勸戒故師召竟以醇學篤行重於時君子謂陳  
氏有世德焉銘曰龐積薄發在物為幸彼邇觀者顧為  
物病盍觀陳公久乃彌盛時變俗易趨偽如競公有世  
守守樸為正內修外順以聽定命天道弗僭自貽伊慶

我銘匪誣已俟其定

明故封承德郎戶部主事許公墓誌銘

公姓許氏諱廉字清夫四川眉州人家本鉅族元季兵  
亂譜逸莫可考公考諱容號松屋母韓氏夢五色大鳥  
集于庭生公姿表特異兩目炯然松屋曰果英物也三  
歲時松屋抱過州治憩城下公仰見城扁眉州二字因  
以手畫地宛然成畫自是資性朗悟日誦數百言屬對  
響答人摘其奇者以傳舅氏韓叔珪嘗攜入成都遠近

聚觀試以詩皆立就稍長通詩書春秋旁涉百氏尤工  
書法屢試鄉選不利有司舉賢良辭不就遂棄舉子業  
徜徉山水間著筆山樵隱及渠瀾集若干卷蜀人購詞  
翰者越郡歷邑至屢接戶外然公恒自歎視未嘗恃以  
驕人人益多之公少喪母事繼母若所自出惠撫弟妹  
與人交重意氣不為崖岸蓋非獨葩藻士也正統某年  
以疾卒某月葬州西南飛鳳山之原後若干年以子楫  
貴封承德郎戶部主事公配周氏撫寧知縣鑑之女少

閒雅喜讀書撰孝經小學列女傳皆成誦孝事舅姑公疾時嘗割股和藥以進及公疾革欲以死白志公覺之執其手曰若俱死奈子女何周泣曰惟命時四子相林梅楫皆幼有諷令業賈為養者周輒然曰非吾夫意也並遣就學後相為崇王府教授霖為國子生梅為固始訓導楫舉進士拜戶部主事周亦以楫貴封太安人太安人就養京師復歸眉楫奉使便歸省適太安人病卒丁酉五月八日也年七十有六某月某日合葬葬去京

師遠前後皆未有銘戶部君既復官乃持狀徵予銘狀稱公負材不試又蚤世卒時無邇遠戚疏皆痛惜不置諸子皆以儒學取官秩戶部尤顯古稱位不稱德有後况無位者宜於此取焉是固然哉公生幾女一適指揮萬壘今閣老公從子也銘曰唐有元賓宋淳夫才而弗壽中道殂韓銘黃詩哀以吁生也無官歿有譽眉山許公華且腴五色雜組雙璫琚三十七載如朝晡彼造物者榮而枯安用有才如此乎公有四子皆文儒前雖不

足後有餘公有遺教非庭趨有賢而慈嚴父如龍嘈鳳  
山氣盤紆鍾奇閔秀於此俱我銘茲立世不渝

明故刑部郎中奚君墓誌銘

刑部郎中奚君時亨勘獄瑞州還至杭州得疾卒按察  
副使李君若虛方提學浙江日視疾具湯藥比卒治含  
歛衾槨甚備航君喪歸華亭時君母太安人及妻若子  
女皆寓京師聞訃痛絕諸寮友皆驚悼相弔尋得若虛  
書咸相慰曰李君不負時亨吾徒可獨負哉於是屠郎

中元勳為狀周郎中良璧過郎中大濮柳員外拱之諸  
君屬予銘達君女兄之夫孫鏞者來奉太安人歸自京  
因寓銘俾刻石內君墓壙予辱君還往且聞諸元勳及  
馮郎中佩之知君賢為詳乃序而銘之君諱昊字時亨  
姓奚氏世為松江華亭人質貌穎異九歲就外傳囊白  
金為學資有婦人道哭問之曰家貧鬻絲得百錢而遺  
之舅姑老無用為饘粥具君即以所持金子之歸白承  
德公公曰兒能如是吾無憂矣君弱冠從承德公于合



公疾君刺血籲天求以身代又重傷太安人心匿不使  
聞公卒君奉母扶櫬歸廬墓終喪籍府學為弟子員舉  
成化戊子鄉薦連擢己丑進士第循例歸省壬辰拜刑  
部主事明敏精吏法片言擿伏人服其能遷員外郎勘  
貴州獄歸奏稱旨進郎中庚子伏乞歸省太安人遂就  
養焉居數月會瑞獄作事尤劇君受命往日奔走勞瘁  
成疾以卒壬寅三月望日也年三十六娶潘氏封安人  
子一曰伸女四皆在室君和厚易直重恩義幼學時母

析貲予之君悉讓兄冕俸所得金帛必分族屬為員外  
時同年董知縣失官道遇寇貧甚君為館穀給緇續厚  
贍之還使經景州有故寮劉判官死五年不舉君葬之  
且卹其家平居恭孫見鄉先輩無窮達皆不敢慢處寮  
寮終日不色忤故人多愛樂之尤嗜問學寒暑不時輟  
喜臨晉唐書為詩文往往有奇思與客賦詠值意得恒  
夜分不寢有干東稿若干卷藏于家君墓在某山葬用  
是歲某月某日從吉卜也銘曰利劒研發其聲有劃儵

歸大津光彩滅沒孰爾淬之孰爾閔之鬼神有靈百世其衛之

一樸居士蔡公墓誌銘

進士蔡君清得告歸晉江念其大父居士公未葬葬且迫介喬進士字請予銘自述祖業甚悉曰清不敢誣吾祖也清有文學名觀其辭核而理乃據以銘公姓蔡氏諱潤字懋德以字行號一樸居士先世譜逸不可考元有諱謙者於公為高祖居泉之惠安祖諱惠至正間避

亂泉城壻于晉江朱氏始為晉江人考諱輝國朝永樂間舉貢士母林氏公少失怙家貧甚門戶幾落公奮自樹拔與其配林氏備嘗艱苦銖累寸積積稍裕及母棄養諸弟妹皆壯長力為婚嫁弟懋敬病且死舉財物契券及其遺孤屬公公治後事撫其孤長則悉舉故所屬者歸之嘗曰吾不能顯吾親期不辱吾不能庇覆吾兄弟亦盡吾力而已矣年五十外內事悉付二子惟課孫讀書督僮僕治樹執暇則匡坐一室非大賓客及鄉飲

禮請未嘗出戶閤雖居闕閤間有不知其公者公重先  
祀昧與謁祠堂已乃出治事夕復謁始就寢祭必備物  
或病弗克與則飭子弟惟謹身以勤教孫清出就傳旦  
必問曰清入塾未未則戒之曰汝貧家子不可作富貴  
相見其字畫不楷則曰是亦學也奈何不敬凡器物或  
損壞未嘗介意獨於書甚愛護每戒子孫曰吾於此雖  
不甚解然聖賢所著要不可蔑視且吾先世遺物惟此  
耳汝輩慎守之見子孫為服為新製輒感然曰何得效

俗兒女子態也公性謹飭不喜博奕戲劇事質不外飾  
嘗曰吾無他技能惟一樸耳其所自號以此公既不試  
志業無所見故其言傳為多郡縣吏雖不時見然知公  
賢恒曰使吾民皆蔡某官府無事矣按察僉事林吾克  
賢恒下郡縣詢行義命泉州知府沈海書公名榜于旌  
善亭云公卒于成化某年某歲葬潯美山壽七十六配  
林為山陽教諭廣之女子三長觀慧清父也次某某孫  
四曾孫一存畏銘曰善不必大惟實則有節不必奇庸

乃可久曲士詭行嗇夫利口勞身徇名為祿之誘若置  
斯獵若弋斯取旋棄所執若視芻狗嗟今之人固也誰  
咎樸哉蔡公有順無揉外無顯名內省奚疚公心則寧  
公死不朽

懷麓堂集卷四十七



欽定四庫全書

懷麓堂集卷四十八

明 李東陽 撰

文稿二十八

誌銘

明故征西將軍鎮守寧夏都督僉事周公墓誌銘  
公諱璽字廷玉姓周氏其先本永平遷安人伯祖亨洪  
武初內附授燕山護衛指揮使賜田宅因家東安祖斌

永樂間以靖難功當擢都督讓于兄或考諱英宣德間  
坐累謫戍開平衛累功擢都指揮同知寄祿府軍前衛  
成化丙戌以老謝事公代為指揮使辛卯征北邊以功  
擢署都指揮僉事用薦領十二營號令尋統五軍右掖  
戌戌勅充右叅將分守陽和庚子與威寧海功進都督  
揮同知調大同副總兵辛丑以黑山墩功進都指揮使  
壬寅以黑石崖功署都督僉事癸卯北邊伊斯瑪音大  
舉入寇分兵三千守懷仁賊逼夏米莊中軍失利公還

兵內援夜忽值賊營時賊乘勝勢甚銳公大呼屬將士  
曰今日之事有進無退退則無遺類矣衆爭奮無不一  
當百銳弩齊發呼聲震天地賊少却良久復突入短兵  
接公臂中流矢令左右拔其簇督戰益急與其子鵬及  
死士數輩斬獲十餘級會遊擊將軍劉寧兵至合為一  
營中軍潰卒多來歸兵勢乃振賊既退失律者皆得罪  
錄公功進都督僉事甲辰改充總兵官鎮代州兼督鴈  
門三關弘治戊申移鎮陝西庚戌命充總兵官佩征西

將軍印鎮寧夏甫一歲議修邊備為遠久計偶得疾召諸子曰吾生獲佩印分閫分已足無所復望獨未嘗大破北邊為朝廷報抱恨死矣氣就絕忽大呼曰好殺好殺遂瞑是為辛亥七月十五日年止四十有二生子四長鳳蚤卒次鵬以從征功累官錦衣衛指揮僉事次鴻次鵠公醇雅有禮度中亦負氣泣事斬斬尤精騎射知兵習戰近時論邊將者必指屈馬奉二親謹甚迎養大同比喪遣諸子還葬都城東今所祔墓是也其名曰魏

村社之原予雅聞公賢公之卒錦衣衛指揮同知劉公  
彥芳持狀為徵銘予又聞鳳卒時其妻都督王君賓之  
女號泣不食死詔旌所居曰貞烈之門公之風又于是  
乎在銘曰漢出雲中動以萬騎公兵三千力折胡勢宋  
睨西夏屹為外虞公提全軍坐鎮強胡惟公才賢適際  
斯盛以守則固以戰則勝惟天子聖俾我兵是競惟古  
將才必鍊乃成公在三陟久益有聲天弗假年疇不興  
戚曰此豈易得而奪之亟有歸東原公歸其間公靈在

邊為河為山偉哉公名雖死其勿謾

朝邑縣學訓導致仕張公墓誌銘

成化乙巳夏六月二十二日朝邑縣學訓導致仕張公卒于澤州自甲辰之秋山西大饑人相食餓莩蔽野歷冬及春厲氣交作死者復相繼時公年已七十有二其卒也亦以厲云嗚呼傷哉公諱翔字騰遠世為澤人考諱某母宋氏公生而聰慧果毅工書善記誦入州學為弟子員問學勤厲雖大寒暑必正衿披誦未嘗色惰事

親志養產不踰中人而奉養必備親疾必憂形于色奉  
三兄謹甚不命之坐則侍立終日家中析公所取田廬  
未嘗有所擇兄泰夫婦繼卒以遺孤屬公公撫若已出  
為娶婦至長子孫不使異產父喪嘗市木為棺而逋其  
直偶行雪中躡得一物視之乃白金一錠求其主不得  
遂酬木直鄉人異之曰此孝徵也凡喪具服制皆用考  
亭禮以至于冠昏交際皆然公以詩舉于鄉屢不利以  
例貢禮部始授學職至朝邑歎其學政久弛身先訓率

必敦本實次及文藝亦嚴立程格終始不變於是科第  
踵接九載有成績當陟以老乞歸家居惟課子孫讀書  
史申明孝弟間以訓鄉後進勸善戒惡其言悃悃懇到  
聞者悅服皆稱為鄉先生焉公嘗慕薛文清公之學遣  
子澤就學河津舉進士知武安縣實就養教以官事澤  
以廉能著政譽徵入為河南道監察御史蓋父師之教  
為多公子三長澤次漢次某初張氏墓在河西金岡嶺  
今卜遷于州城郝家莊之原以是年某月某日葬御史



君奔喪將歸介其鄰武學生徐君鏞來購銘予聞御史  
賢按所自著狀得公行且悼其值時厲以死雖壽宜傷  
也蓋於是深有感焉乃作公銘銘曰生也逢時壽考且  
康老不逢年卒以疾終古有養老于鄉于庠國典具存  
而公則亡吁嗟乎張公

焦生邦重墓誌銘

焦生瑾字邦重侍講學士守靜先生孟陽子也卒于京  
師先生哭之慟至忘食寢予先生同年友義均兄弟聞

生死悼歎不能置與諸同年為文弔之及歸葬泌陽先生自書其性行歲月授予屬銘予尚忍辭哉生始名恩榮蓋先生舉進士為翰林庶吉士生生京師報至家時有司方建綽楔榜曰恩榮先生之父封編修公遂以名既長乃更今名生四歲喪其母呂孺人先生以編修歸省實攜生以從既還朝公及祖母某孺人留不遣七歲病癖藥之愈公令羣兒嬉聚以悅生生每凝坐不一視公異之稍長授以詩書不數過輒成誦公曰此可教也

遣其兄琦攜致京師就外傳沉默自持雖師友問答不  
過數語先生疑以為鈍及考所業則未嘗不通平居言  
若不能出口及誦書史見古人事行試令辨曲直賢不  
肖時當人意為舉子義輒合渠度書字亦清勁同學者  
皆自謂不及不妄取予不濫與人接嘗謂其弟黃中曰  
吾見同游有狡詐者彼自謂得計詐豈能欺人徒召憎  
耳汝資性過我但恐為此輩所移易汝其戒之嘗侍先  
生獲觀程明道秋日詩邵康節大易吟退書之几格反

覆諷誦若有所得也生嗜學欲速就積勞成疾見其父  
憂形于色輒強顏慰之曰兒病行愈大人幸盡心職務  
勿以兒為念踰年益憊先生謂曰兒脫不諱俟汝兄弟  
有二子者為汝繼不殄汝後生但飲泣其繼母郭及兄  
瑞問之皆不答私謂其姑曰我無他囑但勸我父勿哭  
我也成化乙巳六月二日卒年二十有一聘胡氏縣學  
生繼之女待年久之竟未及娶以死予同年家子弟若  
侍講東瀧彭先生子彬方石謝先生子興仁今南京太

常少卿愧齋先生子罕皆敏而早卒予連喪二弟山川  
慟而成疾故予生感之尤深嗚呼吾又忍銘哉銘曰嗚  
呼焦生胡質斯弱而志斯強踴躍振迅崛起而莫之撓  
也稼未穫而稿樹未實而傾天實摧之豈人弗能吾為  
汝銘以釋汝靈以慰汝父兄嗚呼焦生

明故文林郎河南道監察御史李君士常墓誌  
銘

成化乙巳春三月士常以御史巡河南東陽與倪學士

舜咨諸公出餞城西僧舍士常意眷眷不忍別冬十月  
聞巡撫都御史報則士常已不起矣東陽與舜咨驚愕  
相弔既又與嫺友潘時周會哭以書訃其兄士儀士儀  
悲慟欲絕遣弟繕及從子穆迎喪遣子稷來告哀徵銘  
東陽得書哭失聲及喪歸道京師寓諸郊數日東陽與  
諸友往哭奠之乃為銘昇穆歸俾葬焉嗚呼吾忍銘士  
常哉士常姓李氏諱經別號力齋其先鳳陽臨淮人也  
曾祖諱濟元季以鄉兵歸國累功授廣信衛正千戶祖

諱庸陝西都指揮僉事考諱徵萬全都指揮僉事始居  
萬全兄士章署都指揮僉事世有勲望士常幼端重如  
老成人為都司學生刻志問學夜或睡輒以手自批其  
額頗舜咨父尚書公謫戍萬全士常寔受學有名諸生  
間葉文莊公為巡撫賞愛特厚薦于我外舅蒙泉岳公  
為壻公時知興化府得葉書曰與中不吾負亟報許之  
士常游蒙泉門久學益進御史林貴實閭子與督學政  
咸見器許甲午舉鄉貢戊戌登進士第奉詔入翰林為

庶吉士辛丑拜河南道御史奉勅巡山海諸關二年政  
令明肅歸掌道事覈京官稱負尤嚴慎不苟及巡河南  
令有司毋貸市物而稽其直聞者皆相戒莫敢肆時歲  
大凶上疏言懷慶諸府民父食子兄食弟骨肉親黨相  
噬死徙十六七雖蒙赦宥宜大肆蠲卹庶他變可彌又  
與巡撫會議諸賑卹事未及報益憂憊薄訟填委不遑  
寢食冒暑至洛陽疾作復有公事當詣汴猶閱案過夜  
分乃行至則益甚語已不可辨猶隱隱言採荒事九月



二十一日卒屬續時巡撫及布政按察諸公皆臨視知  
開封府張九雲治含斂棺槨官給驛傳復遣使護送以  
歸十二月二十九日葬泡沙原祖塋之右士常天性孝  
友又習世訓居喪蔬食三年兄弟雍穆晝聚處堂上暮  
乃歸寢兄出未返過期不敢飯閨壺和敬迭為賓禮叔  
母甯寡而守節終身母事兄士章子指揮同知稽及穆  
及兄純子程秀皆早孤視若己出或親為講授繕庶弟  
也遺腹于外及長謀歸之為娶婦焉士常赴義如渴勇

不計力人有善推誠嚮慕意氣所屬歷歷出肝肺守官清儉家指既衆俸不給或稱貸為旦夕計及遇文人墨客竟日延欸與相倡和所得詩賦至累篋笥猶酷好不厭自出翰林為御史雖極通要而非其好竟憂勞以死嗚呼悲哉士常娶于岳賢而早卒封孺人繼娶王為即墨知縣時佐之從女封孺人生三子秩和穉皆幼士常善楷書恒曰吾兄書法過我謂士儀士儀乃自書此銘曰以慰吾弟東陽為篆蓋亦士常意云銘曰官高任艱

君子之憂曰貴曰富匪我攸謀彼藉勢者為身為家官而已矣遑卹其他君居御史不樂其華我職弗遑而暇為夸孝廉儉勤君行則有斂焉弗張君子之守迪而獲咎豈理之常人則何尤悠悠彼蒼我銘士常百世不忘

封宜人喬母路氏墓誌銘

兵部郎中喬君廷儀既葬樂平長壽山越七年成化丁未七月六日君配宜人路氏卒于京師故第子宗宇輩扶柩歸卜明年正月某日啟窆而祔以予嘗著君銘知

族系家範頗悉請誌祔事及宜人懿行庶有所互見者  
嗚呼先君之殯也宗昆弟慰我相我意勤甚今日之事  
予惡得無情哉乃強援筆為誌及銘路與喬同出樂平  
族故望宜人營膳所丞仲室女在襁褓間為怨家所毒  
幾死母孫禱于神而甦因異之少精女事通孝經列女  
傳諸大義未笄有縣令主其家從者亡金五十兩懼欲  
自引決宜人偶得諸后圃白其母還之郎中君從厥考  
工部侍郎公試京師營繕重其秀且文遂受聘焉既歸

晨夕饋食湯藥暨諸時祭皆精洗有度事姑王淑人及  
庶姑高烈婦懃曲承順善成其懽郎中君肆舉子身以  
勤相夜夜鼓始休漏未盡必夙興以待比舉進士官兵  
部封安人又進封宜人雖寢貴服用皆故物從子憲宣  
失怙恃撫之有恩宗宇幼手教字畫稍長遣就業每嚴  
誨戒及宇舉進士授禮部主事戒加切每朝有吉禮宇  
典儀制例得賜幣宜人必斂容曰此君賜也宜人何修  
以報宇將造朝必起坐詢早莫出乃就寢故宗宇皆有

名士大夫間自侍郎公以下三喪宜人皆歸治葬已復就養益綜家務雖無贏貲食指數百皆受給處側室陳甯三十年畧不為形跡至同食飲視庶子宜宸容未始有異侍郎公當蔭國子生宗以長以讓宜宜人喜曰兒能爾固善尤樂施予族姑子張戎貧不能娶給以金帛永清馮德成者有急質女求貸貸之金并其女歸之從子僕劉溫廢疾被出宜人憫其窮為之娶而遣之聞有籠鳥于市者粥而縱之以為常其多至數十焉平居溫

厚容忍簡言笑婢僕輩未嘗見喜愠色戚黨女婦凡一  
接無不意滿卒之日多感慕泣下曰今安復有如喬宜  
人者邪銘曰有夫克肖婦佐之孝有子如夫維母之撫  
從人者艱實恃以久為所從助乃謂能婦亦謂能母生  
從厥居死從厥封我銘郎中繼銘宜人以備始終

封宜人朱母黃氏墓誌銘

予少與崑山朱儀中交甚厚獲拜其父奉直公及母黃  
宜人宜人之喪儀中將覲自太原未行得訃至京師乃

自述事狀請予銘曰以此累吾友也是宜銘宜人之先  
蘓之長洲人處士仲光之女朱在隣邑族相望又俱籍  
京衛故宜人歸于公宜人事舅姑甚謹凡侍疾居喪如  
居官省時家寢饒食指益衆相公蠱幹雖澣衣敝物不  
忍棄睦處姊姒均視羣從翕無間言下逮臧獲小有過  
務掩覆之皆飲德焉儀中始自黌塾歸宜人必詰所業  
視勤惰為憂喜比舉進士官兵部教使清白奉職以承  
父訓日勤勤不置以主事貴封安人以員外郎進封宜



人儀中為郎中坐累謫常德同知改知德慶又內徙同知太原道京師乃請就養宜人不肯行又閱歲而卒距儀中至僅兩月耳儀中痛身在遠貽其母之思以沒且弗及含斂曰吾乃以此累吾父也復念其兄縉在蘇尚未歸又數月乃葬蓋宜人卒以某年葬以某日其地在城南十里河之原舊以族葬地且陜乃闢其旁遷壙其中而右虛焉禮也銘曰有子翹矣愛亦勞矣養弗酬矣嗟無繇矣訓則勿違行則勿隳維子斯才以成母儀維

宜人之宜兮

華編修伯瞻墓誌銘

嗚呼伯瞻乃止是耶伯瞻質偉氣充才勃勃不可遏其志所期甚遠且大舉進士財三年官一命年二十有四而止悲夫初伯瞻從其父廷佐君居京師時未冠學于楊邃菴應寧與太原喬宇希大並價予見伯瞻書勢已逼人私喜吾湖南後來之傑蓋其在此及伯瞻舉鄉試第一連得進士入翰林為庶吉士汪寅軒傳體齋二公

奉詔授業大見甄賞每閣試與稿城石琚邦彥相甲乙  
授官為編修予又喜曰此天所以玉其成也予與廷佐  
君同鄉又邃菴知己友故伯瞻視我厚至是又同署日  
益密每有作未始不出見見輒加進一二載間遂脫舉  
子習得古人蹊徑詞簡意達粲然成章予嘗以聞諸劉  
文安公者告之謂為文必先博而後約收斂太早則其  
地無所容伯瞻以為然然執不變意者天將速其成故  
使至是哉使天果有意焉則斯人者胡不姑涵育長養

俾大有所就之為愈也予益以慨人之才不易得且不  
易成也悲夫今年春廷佐君以常州知府入覲歸伯瞻  
已病秋益劇卧不見客予數往乃彊見之恠其神荅然  
比得告猶函一卷具書致予曰巒且別願得手書數通  
以歸書未成而訃報予既往哭之念無以慰其志者乃  
據邦彥所著狀為銘屬希大書而刻之又自書于卷中  
以畀其家藏焉償舊諾也伯瞻姓華氏巒其名世居蘄  
州以州學生舉生成化某年卒弘治某年葬于州之某

原娶王氏子女各一人皆幼銘曰吾黨得之吾曹得之而遽失之吁天誰詰之

奉議大夫刑部郎中何君墓誌銘

君姓何氏諱說字商臣世為彬州人祖諱義堅合州同知贈戶部主事父廷彥雲貴提學按察司僉事君少從按察公遊學京師赴湖廣試御史樊君英奇之比卷拆且盡得其名謂眾曰此不可使小就寧勿取後數年成化庚子果得解元連擢辛丑進士第久之授刑部主事

侍郎建昌何公嘗監試湖廣雅罷君見所屬獄案曰吾  
謂子文士耳乃能是也嘗勘獄順義有兩豪爭地事涉  
中貴人剖析無所避遷員外郎時何公為尚書令總諸  
司奏牘校閱精敏山西有亂民御史以謀反奏獄且具  
君閱卷曰反罪當孥此不過假佛惑眾雖潛表通胡不  
果至乃謀叛叛止死耳竟用其議活數十百人及遷郎  
中階奉議大夫嘗奉勅錄囚南畿凡錄六千人上獄三  
千餘疏多所平反揚州有毒藥殺人獄君析其疑數端

果邏人有隙者所構奏釋之廣德有饑民貸谷不得而  
羣奪之者連四百餘人皆坐死君矜其情許自首使償  
谷且杖遣之皆泣拜而去歡動州境還朝名愈彰莆田  
彭公為尚書益重之旁攝他司事鉅細無弗集者弘治  
癸丑刑部災君坐本司下都察院獄詔降一等補外君  
在獄已沾疾得命出一日未調而卒惟其子進士孟春  
在側大夫士聞者皆悼君賢弗克壽且奇孟春才哀其  
摧毀骨立又貧甚貸而將事右諭德劉君道亨為著君

狀孟春予禮部主舉以君沽命且受學焉哭告予曰微先生孰可屬吾父者嗚呼予安用為君慰哉君父按察公舉己丑進士累階奉政大夫致仕以恩加修正庶尹子二其次孟旦女一君年四十有三卒于某日卜用是年某月日葬某山之原君清謹重厚不許人過遇事有力母喪廬墓有芝生于旁人以為孝感云銘曰惟湖南地三世進士自何氏始亦云奇事家用易學受父授子科必丑歲歲必周紀君舉在辛先己後癸君獨中阨如



澤斯沛孰傳其原孰導其委天實為之請究終始

明故兩淮都轉運鹽使司知事周君墓誌銘

君姓周氏諱澄字原潔其先自道州徙巴陵塘源居數世曾祖諱國才祖諱桂芳考諱思恭妣傅氏生四子君其長生有奇質受書鄉塾兼通法律有用世志未遂也湖廣布政使司嘗缺知印知印者主印記出入役雖勤不與諸從事伍君以名為府縣所薦黽勉就役而非其好有為布政者雅罷許之或訊以政務亦稍稍自見授

廣州府倉大使當藩臬交會出納繁夥動會計慎勾稽  
宿姦斂手不得肆則相扇為浮詞構以罪按察分司不  
能直君具疏愬諸朝下御史按察姦狀事乃白秩滿丁  
內艱服闋遷浙江上虞縣主簿地衝要多賦訟君以習  
律故皆剖析得理部使有大獄久不決則以委之嘗攝  
餘姚縣事餘姚故接境民聞君至輒相率共賦役不督  
而辦叅政何宜檄領京儲兌運事舊時悍卒多怙力侮  
民民代補耗虧為所困君悉意規畫益嚴為約軍民皆

稱便何嘗與論水利至夜分不寐歎曰能官也浙東海  
溢上虞尤甚工部侍郎李公顥築堤海上君承檄受任  
與有勞効九載將去父老合詞請留于御史及布政按  
察例以未報政不許比上吏部考入優格復丁外艱服  
闋擢兩淮都轉運鹽使司知事署泰州及淮安二府分  
司兼掣淮安鹽貨嘗攝篆事事皆集諸場戶白于都御  
史張公瓚再被獎諭聲益振然亦坐劾瘁得疾成化癸  
卯八月翔卒于官年五十有九有司用例具舟歸其喪

乙巳某月某日葵珠冠山先塋之次娶某氏子四長質  
次貴次賢次賓君葵未有銘貴在京師聞母喪將歸地  
陝不合葵畱別為銘內君墓乃奉柳貢士大綸所著狀  
介李貢士永敷以請于予嗚呼今之人或負才挾智位  
小不稱志已不屑致力或躋重泥遠名浮而實喪雖貴  
且顯亦奚以為哉君歷三職二十年官不過八品矻矻  
窮日夜竟以勤死計其所克濟亦已多矣是可錄為有  
職者勸銘曰匪甲科是塗而辟于蕃弗正寢是終而死

于官然則生距非榮而死寧弗安後五年而得吾銘庶  
以為永觀乎

懷麓堂集卷四十八

欽定四庫全書

懷麓堂集卷四十九

明 李東陽 撰

文稿二十九

誌銘

退庵處士趙公墓誌銘

予舊居西涯與退庵趙翁同里先公年與相若時歲相還往  
既遷城西時時念之翁以其子永學於予先公實見命焉先

公之喪翁每為助及經理諸葬事不厭纖悉且為相吉壤過  
厥先墓曰庶幾他日相從於地下也予用是念之不忘嗚呼  
孰謂翁亦棄我去耶翁本臨淮武家祖仲良以伯父勝貴贈  
明威將軍長陵衛指揮同知考諱雲從兄於官遂為京師人  
翁失怙與兄某承母賀氏以居甫弱冠輒共任家政遠涉  
湖海為陶倚術既負藝識儕類歸服家日裕視兄為多兄卒  
禮事寡嫂婚從子三人一人為僧別構庵居之獨念得嗣晚  
義給貧困折券棄責將為後地踰年而永生又數年後得子



杲翁曰永也敏可使就學俾事舉子業將用儒顯蓋於此有遺望焉病且革強執予手意有所屬也將屬續其家問之曰得無念永乎乃泣然隕涕而絕方予之未至也以所名子通沾賈事頤拍手授克獲其力人亦以見公之能云翁初娶吳氏生女四人適某某繼娶胡氏生永杲及二女適某某翁生某卒某壽七十六墓在都城西北傳家莊之原舊以族葬吳窆其右方至是永杲啟窆內公柩祔以吳而半虛焉既得卜於某日永號泣請

曰非先生銘孰以慰吾父者乃為叙及銘銘曰吾父之  
墓實鄰翁墟吾神不孤翁與為徒翁生我娛翁死我吁  
我情所於銘其舍諸曷其訪翁墓祀之餘

喻孝婦墓誌銘

有服哀杖桐乞為其母氏銘者介指揮張文仲以請予  
辭曰女德類弗著勉為之非吾意也張曰茲有孝行其  
諸異乎世之為婦者敢因以請問其姓名則吾友司務  
喻以正之兄以善之子心固已許之誦其狀為訓導仇

東之所著蓋喻氏一孝婦也因歎曰嗟乎近乃有斯人  
哉世之稱為子者尚不克自致於親況婦姑哉誠有是  
雖不吾請吾固將傳之按孝婦姓王氏諱真其先出浙  
之仁和永樂間徙實京師為順天大興人考諱貴母陳  
氏喻本南昌望族以尺籍隸京以善其少也方擇配孝  
婦歸焉事姑韓謹甚韓嘗病亟藥弗效孝婦計無所出  
瞿然曰嘗聞老醫言人肉療奇疾非此不可即潛入幃  
中剪左股肉為糜以進韓食已爽然而甦曰吾已分死

不救何醒之亟也孝婦匿不言韓察其有痛狀詢家人得之泣曰新婦乃至此乎天道亦甚邇願新婦他日得婦如新婦也鄰黨歎息或為泣下以善以內行不自暴有司者莫能旌之然人多稱為喻孝婦云孝婦年六十三卒某日葵大興東郊下馬社先塋之次子一曰春嘗捐貲給邊授階七品孫一初孝婦之嫁也喻業中落以善始起廢成裕孝婦稱內政實與有力及富不妄費一錢惟享祀必洗腆撫臧獲務俾暖飽無怨言此其餘事

云銘曰昔有崔婦登堂乳姑姑視吾婦汝報不孤喻婦  
實難彼崔弗如彼以其力我以吾軀惟天弗誣有子克  
家有狀足徵我銘匪誇

明故封大中大夫陝西布政司左叅政梁公墓

誌銘

崢為縣在代州邊地多武尚鮮有以儒顯者自直軒梁  
公以子景貴封徵仕郎兵科給事中再封大中大夫陝  
西右叅政其配某累封至淑人及見其子為都御史鄉

有識者皆感奮曰賢哉梁公乃以子致貴如此皆遣子弟就儒業多至若干人比公卒無大小疏戚皆會弔齋咨涕淚以為公實啟我今不可作矣時都憲公方承勅巡撫湖廣歸奏於朝計襄事期迫不克久滯都邑預囑其甥丁戶部紳請予銘刻石公諱資字叔敬直軒其別號也曾祖某祖某考某皆寓儒於農公通六藝能為五七言近體詩每見前賢格言善行必興慨慕恒歎後進士曰讀書不求實踐猶不讀也性質直無他嗜口不談

勢利尤不信釋老喪家有問禮者輒云佛老法語人過  
及改悔則又為獎振之故雖被斥責亦不為憾且賴以  
自直達官貴人多折位勢為禮貌若都御史李公祝泰  
公絃每詢兵農政務語必移日而一不及私二公退曰  
梁先生吾之石洪溫造也諒不能言口授以詩輒成誦  
知非几子俾舉進士竟以是成其在兵科為給事中戒  
以清慎始貤錫命為叅政益舉職左都御史余公子俊  
而下階旌之吏部下御史覆實命始再錫副都御史雖

要顯秩不過三品錫不改命然鄉之人皆以都憲禮尊之無異詞公益遜避若未始有者蓋終其身不變也尤嗜義姍戚婚葬視力為給旁及鄰里多飲惠沐澤焉壽八十有三忽疾革召子孫具湯沐澡衣曰吾今日稍倦殆將歸矣問以後事不答越明日乃逝是為某年月日配史氏賢而同封累號曰淑人先公卒子二長琮義官璟其次也孫五枋楫及某某曾孫七淑人某某原公卒之年某月某日啟窆而定以淑人祔嗚呼古者文質並



用乃稱君子世降俗薄識者病之梁公以經學顯實由  
父教都憲尹敦雅不浮慎守恒執不為勢位所移易其  
於家訓蓋有徵焉公其賢哉生有譽望沒有銘誌以貽  
後人非侈也銘曰梁望西徼顯於封君維君有封維子  
有勤我邇求之由枝逮根越三世以降種德以芸久乃  
有獲自貽厥身屹屹西亭位隆望尊彼稗與莠曾何足  
與倫我最其德以刻銘之

明故鎮國將軍都指揮同知王公墓誌銘

王氏出鳳陽穎上為世族元山東行省右丞榮入國朝  
內附洪武初授神策衛百戶遷密雲中衛副千戶子禮  
嗣從大宗靖難遷指揮僉事子宣嗣實生公諱榮字士  
華五歲而孤正統改元嗣指揮僉事署衛政分領邊伍  
名漸著天順壬午用薦承勅鎮密雲古北口諸路公申  
號令利械器閱實兵旅分前後次日嚴備守憲廟即阼  
賜白彩幣敵入寇公出龍王谷追三百里俘男婦八人  
斬首九級捷聞擢署都指揮僉事所統官軍士賜官賞

有差成化癸巳敵甫入公出大水谷追四百里斬首五級遂拜受都指揮僉事甲午復追敵古北口三百餘里斬首十七級歸所掠牛羊以百類遷都指揮同知躬閱要害置害窩弓釘盤諸罷賊近輒受窘以去其所鎮地西東五百里長城萬餘丈皆壘石為之水至輒敗修築無寧歲公煉為石灰填土為甃重治之城因不圯復以地廣難備請移關東北姜毛谷諸隘地增城堡遠斥堠前後至二十五年境內寧謐朝議偉之會有嫉公者媒

孽其短遂謝事居五年卒弘治某年月日也壽六十葬  
城東五里原先墓予聞邊將與大將異才而所處亦異  
宜公所負抱無愧所謂邊將者用不競施而滿見沮厄  
豈不惜哉公娶夫人孟氏繼夫人朱氏子五人某某孫  
三人某光祿典簿李君廷器為勲請銘自為著行狀并  
道其終始之概如此銘曰闕城翳翳為國東嚴屹屹王  
公手扼其隘寇至輒退我擊其背彼既失勢莫我敢肆  
孰能挫公敵不在外公不自媿曰我寧退官我自取亦

復我棄孰謂公棄公澤在世

楊君丁宜人合葬墓誌銘

吏部右侍郎楊君文懿之配宜人丁氏扶公喪歸鄞朝廷方遣官治葬宜人亦卒其子按察副使茂元任湖廣合葬於堂洞山之原公行既有銘而宜人事未及載茂元乃具書請於公弟翰林侍講帷立速不置予以公故不敢辭宜人公同縣人也父諱瑄正統間舉鄉薦未仕而卒時宜人甫四歲從母樓育於縣南王氏王氏翁諱

宗遂頗讀書尚義氣見宜人夙端慤不苟貲笑口授孝經小學慎為擇對公以諸生赴試間過翁翁與語驚曰此名世才也遂以宜人歸之宜人出富家而楊氏世素儒食指數百菰菽苦弗繼宜人脫簪珥躬織作以佐養且給公游學費雖涉疲悴了無慙色人以為難景泰庚午公發解浙江明年舉進士以翰林庶吉士丁父憂連遭大父母喪宜人承公意治後事甚備事姑張夫人寒暑不易節見稱孝婦既闋服從公於官天順壬午以編

修貴封孺人迎張張弗至每製新衣及致珍味封襲以歸成也戊子從公歸覲日具冠帔自堂下上食及治葬如喪舅時己亥以侍講學士貴拜宜人命及公遷少詹事始得通籍中禁預兩宮朝賀屢荷錫賚公為吏部二子及諸弟皆舉進士布列京署家極顯宜人猶勤內政躬課諸婦習女事每客至庭戶輒聞織紡聲家人勸少休則曰我固樂此且以為子孫法耳蓋至於老不變耳弘治某年月抵家以積憂成疾某日卒壽六十有四少

公一歲三子茂元其長乙未進士累今官次茂貞早世  
次茂仁丁未進士刑部主事皆有文孫七女孫三某月  
日合葬焉嗚呼文懿公以家學名天下其子姓羣從蒙  
養童習皆是物也及其漸積涵洽以底於大成豈獨庭  
訓固亦有內則哉是宜銘宜人之德以為公祔銘曰羣  
羣深閨左書右詩為女中師嚴嚴廟宇朝飭暮呂為大  
夫宗婦少而劬老而於我儉我勤孰我或渝以迪  
以遺皆夫君之餘其餘伊何台爾鼎爾我力弗既庶其



在此雖復有此惟夫君是似夫君是似我死其無媿

封孺人張母姚氏墓誌銘

都察院右副都御史張公敷華以湖廣布政使拜巡撫  
山西之命歸安福省母姚孺人至黃州得訃亟奔治葬  
事事且集以例告守制於朝會廣東叅政伍公孟賢在  
京師因請著事以屬東陽為銘以掩諸幽時其先御史  
公諱洪死國難以遺衣冠葬於官山原已四十有三年  
至是合葬禮也初張氏世居安福之梅溪為著姓而姚

氏亦望於杉溪兩溪同里二氏之為姍姍不絕孺人父諱某氏母某生而敏慎禮辨內外雖屬姻戚罕有一見其面者涉書史能解列女傳恪奉婦職姑疾踰年躬進湯藥奠祭無違度御史公既取進士有官守劾姦糾慝不復顧家孺人獨任內政不貽外慮公按蜀有患其摧剥者挾賄入京師為中傷計而官邸清肅無所授隙竟厄不行正統己巳公扈從至土木不克歸孺人日夜號慟聲徹衢巷後朝廷進錄死事貤恩封孺人左右進命

服服以拜賜已而泣曰未亡人以遺孫故不能死誠不忍服是遂終身不復服攜孤南歸日勤苦為業遣就外傳嘗指公所誦書諭之曰此汝家世業汝父以汝輩遺我汝弗子我即弗能母他日何用見汝父於地下後敷華以公廕為國子生繼舉進士累官布政使歷浙江湖廣孺人皆就養於官意甚樂然雖貴壽時親女事婢僕效職僚屬家亦有化者焉居湖三年忽思歸歸數月病革前數日謂諸孫曰汝父已得都御史行省我矣蓋其

神爽不亂如此嗚呼古恒以忠臣烈女相配謂委贄與致命之義同也御史公不辱於國而孺人不玷其身以成其家亦庶幾此婦不愧此臣也其固有所視倣然哉孺人壽八十生某卒某葬某子三某某女二適某某孫四某某因為銘曰夫死國難婦死夫婦雖後死死不孤孤者既壯榮弗枯先咷後笑非我圖圖用不辱為道餘報歸地下同歡娛夫乎不愧汝與吾朔魂楚地歸來乎彼鬟弗終隳厥初朝擁荆髻暮羅襦生如繁葩死泥塗

誰復此景收桑榆我徽懿行厥子於銘哉銘哉卒不誣  
外姑宋夫人墓誌銘

嗚呼悲夫我外姑宋夫人之喪外舅蒙翁岳翁無一息  
之肖其伯氏處士公亦已壽終從子許又客於外病且  
革家具蕭然無以供後事者自脫簪制棺為月制制甫  
畢而續屬決於是伯陸氏為治喪從子均垣墉從孫子  
戶林及標格楫梁桂集相與奔走扶柩歸鄒縣相於公  
墓東陽謹著銘刻石以內諸幽嗚呼我蒙翁之盛德大

節所以遺其家者乃至此哉夫人陝之咸寧人世有顯者夫人生而莊肅知書能琴精女事厥考前知州翁擇婿得翁曰此天下士也遂歸之舅氏府君指揮公家甚盛姑劉夫人性嚴奉養惟謹正統末翁進士及第歷翰林編修修撰受知英宗以天順初元入內閣言曹石二家必反因得禍戍肅州夫人實從居五年省還京師憲宗即祚翁被召復為修撰出知興化府夫人畱京師翁既致政當成化壬辰卒後二十年夫人壽七十有二乃

卒蓋公素篤孝友夫人志協力相不遺其憂翁竭節盡  
職不復顧私夫人貴不外溢處難不內懟翁重義博愛  
卹人之孤拯人之急日汲汲不暇夫人惟所命猶恐弗  
給若恒事常職未嘗畧有德色及孀居處獨拮据掇葺  
矻矻終其身而門閭屹立聲望不墜居常談翁所履歷  
及閨闈間語皆慷慨激烈得其義榮非負丈夫器識者  
殆不及此故公卿舊故多致盡敬里黨諸子皆有所倣  
法焉夫人其賢哉夫人生子四人俱殤女六人某某內

德嫗歸東陽為繼室為外孫者一惟東陽之子兆先而  
已嗚呼吾妻之亡兆先生甫四月夫人間謂東陽曰吾  
欲見吾外孫之有婦也乃聘於吾友潘君時用之仲女  
夫人實相成之東陽繫朝籍不及赴葬遣兆先執紼行  
以某日葬夫人以編修貴被封曰孺人今稱夫人致私  
敬也銘曰婦德不必同惟厥從福履不必隆惟厥終厥  
終伊何壽則希有厥從伊何名以不朽嗚呼天乎竟何  
咎



封太安人楊母張氏墓誌銘

東陽與楊應寧為知己二十年獲拜其母太安人數矣  
應寧為按察司僉事提學山西太安人卒於官邱應寧  
書來徵銘曰一清俟此以葬因屬其門人禮部主事喬  
寄為狀翰林庶吉士閻价華繼刻石京師寓而歸先公  
之喪應寧方以書弔我慰我今遽有是託予復惡能無  
情哉按太安人姓張氏大父為湖廣九溪衛安福所官  
世居澧州太安人時為處子方少閑內則應寧先公娶

張繼劉皆早世念嘗為澧州判官聞太安人家範甚習  
乃繼聘焉及歸劉安人遺女甫晬病幾死親提抱同卧  
起求良醫善藥而愈之公自厲為清白吏佐以勤儉及  
同知化州從居十年服飾皆嫁時物處同輩金綺炫赫  
中晏如也州有劇寇城且陷僚屬家皆襁兒女為走計  
太安人遣人覘公方乘城治戰具曰無憂也治家事如  
常時諸家恒視以為重卒無他變公本雲南人既謝官  
占籍巴陵太安人脫簪珥易布粟以為日應寧應奇童

薦奉公及太安人上京師及承詔讀書翰林舉進士公  
始棄養後拜官中書舍人三載考最例得給公勅命進  
階儒林郎太安人封六品號從夫貴也應寧滿九載待  
次疏乞歸雲南省祖墓留太安人居鎮江既修祠合族  
還始置田買屋宇為常業太安人實指畫之應寧得山  
西命重勞起居欲乞終養太安人不許許就養至則體  
不通應寧不敢數出巡太安人輒使行至平陽得病報  
馳還司太安遂不起是為弘治戊申五月二十五日壽

六十有三太安人敦重簡言笑祀事必恪禮處姻族馭  
戚獲無疾言怒色慈而能教京曹賓友以應寧故造訪  
踵接必豐饋食或聞應寧飲笑過度必婉語戒之山西  
學政久貶應寧力剋宿弊有無賴子挾勢撓抗索治之  
幾斃杖下太安人聞之愀然曰法固當爾顧人命亦至  
重爾父嘗言刑曹務平恕竟爾忘之耶應寧之文行一  
時樹立卓卓雖出父訓亦太安人教也初同知公病革  
念不能歸雲南已陵僅係空籍而劉安人女適鎮江胡

宗允擬卜居鄰未果太安人實命應寧葬於鎮江丹徒  
大山支之原始呂縣籍茲以九月六日啟窆而祔又嘗  
念應寧壯未有子命以雲南族兄續次子紹芳告公祠  
堂為冢嗣此二事皆功於楊氏故特誌之銘曰孤城岌  
岌桴鼓親執我從夫者以死殉急翼翼重闡命服有儀  
非子斯才孰我克馳我相夫勤誨子以慈而饗厥終孰  
謂弗宜其饗幾何勤則多有我廉其取以遺我後九原  
有知不我心負孰能我銘吾子之友

明故廣西布政司副理問致仕葉公墓誌銘

吳江地多水坎不能葬者必築甃石冢於其上其工累數千百計凶事既不豫事多至倉猝不克固以為常患味蓴葉公既老自營圖壽藏曰吾得從司空圖游足矣乃相吉壤於殿宇園之原方事封築未竟而卒其子紳益築之踰年而後舉成先志也公諱芳字子春世居吳江之汾湖湖多蓴亢姓所嗜故以為號會大父仲賓九江府倉大使父蕙母鄭氏公性篤而敏善記誦尤工屬

對習詩經舉子業為縣學生御史彭公勗孫公鼎督學  
政每試必置優等試鄉闈屢科不利以年當貢同學有  
徐文王者母年老遂讓之又二年乃貢禮部入國監以  
例歸寧時怙恃既失與其配居刻屬為業又十有五年  
授廣西布政司副理問志存公恕賀縣卒四人樵於谷  
皆坐淫罪久不決公疑之廉得實止罪其二人獲免  
時稱為明當川民林姓者以荒歲轉徙其田為富民所  
業比歸不克復他官言田久無主非富民存之亦為他

人有矣公獨謂田本林產今其故主在惡得言無乃取其大半歸之富民以白金賂公欲盡得之公叱不聽在官幾九載無公私過藉以老乞歸巡撫都御史朱公英素善器使不輒聽懇乃得釋居家教禮義雖底富盛二子皆登科籍恒欽然不以驕人鄰有為不孝者呼而切戒之卒自感化鄉人稱之公年七十有六生某卒某卜葬某子四紳其長舉於丁未進士為戶科給事中有名孫七公夙勤子教念嘗詘於科目欲償取於後及見其



子之成曰吾不憾矣今天子即阼紳奉使南服期得歸  
覲弗及歛例復命於朝乃返襄事因奉狀請予銘且自  
述其葬地始末如此給事中例有封勅必滿三載始得  
拜姑銘此以俟諸他日銘曰汾湖葉公古達者年未髦  
期巡於野後十年餘葬茲土身所自營非手假生怡死  
安此其所生有令名沒不腐樵牧之輩安敢侮

明故南京工部尚書劉公墓誌銘

公姓劉氏諱宣字紹和一字應召其先世家南昌有諱

君造者住南昌為吉州推官始畱居安福祖諱尚勤考  
諱祖昭俱贈太常寺卿公八歲而孤長值家難力就學  
受春秋於禮部侍郎李公紹正統丁卯春父戍盧龍徒  
步至京師冬無纊手足皸裂忽凍死道上有老嫗飲以  
羹始甦夏常中暍有逋夫以熟土覆臍摘園瓜食之乃  
復進已已北使假貢獻圖窺伺公上疏言不可信宜豫  
為備後六師失利公從武官守天津密贊戎事或誘之  
逃或畱妻以女皆弗聽事定乃反景泰庚午例得校藝

京闈巡撫都御史鄒公來學奇公才曰子必為解元聞者皆笑比試果一登第一名頓起辛未會試第九舉第二甲進士簡入翰林為庶吉士壬申授編修癸酉代祀北鎮丙子修寰宇通志成遷修撰天順戊寅歸省母彭淑人迎養於官庚辰同考會試壬午典京闈鄉試人服其公甲申憲宗即祚命充經筵講官丁亥九載秩滿擢春坊右諭德尋以英宗實錄成遷右庶子庚寅擢南京太常寺少卿上疏請增置太廟實座更造進鮮服定樂

舞生名數圖畫功臣諸廟數事多見采納丙申丁母憂  
己亥還任壬寅進本寺卿兼掌國子監事修正條教卹  
病賻死士類咸悅服琉球國遣子弟就學公據例請給  
薪米衣服撫之加厚學者奉束脩金公辭弗受丙午召  
入為吏部右侍郎學者復申前請事聞命公受之公在  
吏部每留意人才政務畢舉丁未旱代祀北岳北鎮祀  
畢而雨弘治戊申今上皇帝特進左侍郎庚戌進南京  
工部尚書剗姦弊稽出納償官逋數千而羨倍之辛亥

某月卒壽六十七公事母孝待寡嫂以禮鞠女兄有恩  
性耿直好折人過人亦以此重之尤熟本朝典故能歷  
數公侯世系成化初禮議慶成宴坐尚書姚公夔詢公  
公歷舉舊制某官坐某所姚據以上奏行之至今為文  
務理勝所著有冲澹集藏於家配王氏累封淑人子三  
長秉常以公廕為國子生次某某月日葬上遣官治  
墓弔且賜祭云東陽公京闈所舉士也故秉常來乞銘  
東陽其忍銘公亦何敢不銘銘曰六卿分職兩曹並舉

公居南曹實掌邦土天子曰咨作我肱股乃身在外心  
實子輔諸吏奉法羣工信度天子曰都是咸在汝公在  
吏曹為衡為權公在大學有身有言文為國華公在詞  
垣由終遡初亦罔不賢天之培之以歲以年國有耆舊  
若龜筮然胡生之艱而弗其延我叙公行揚幽賁玄誥  
命有章諭祭有文君恩在茲過者式焉

懷麓堂集卷四十九

定四庫全書

懷麓堂集卷五十

明 李東陽 撰

又稿三十

誌銘

明故朝列大夫雲南布政司叅議呂公墓誌銘  
姓呂氏諱昇字明遠世為襄陽人祖諱義永樂初累  
擢徽州衛副千戶贈明威將軍錦衣衛指揮僉事祖

孫贈恭人考諱貴嗣千戶有寵英宗朝起擢錦衣衛  
揮僉事後調貴州平越衛以功遷指揮同知階懷遠  
軍懷遠公四子公年最長幼嗜學遊京庠從禮部侍  
刑簡翰林編修劉公昇受易學舉順天壬午鄉貢連  
甲申進士第觀政吏部成化丙戌受戶部主事有勤  
聲庚寅疏乞省懷遠公於平越間歲乃反壬辰懷遠  
卒率諸弟往歸其喪服闋遷員外郎丁酉運舟不時  
命公往督官士奉令罔敢後己亥遷郎中會朝廷用



師建州出督運餉餉不告乏卒且竟典王府冊封副使  
癸卯擢雲南布政司左叅議至則躬親郡縣察隱除弊  
有武官怙勢殺人執法者欲貫之公曰死者何辜竟抵  
法民翕然稱快蒲蠻亂奉檄宣恩德皆帖服不敢肆公  
巡不擇地衝冒瘴毒因獲疾瀕殆乃起丙午入賀聖節  
事竣遂乞致仕弘治戊申十二月四日疾作遽卒年五  
十七嫡母王封恭人生母李及配楊以公貴累封宜人  
子二某年日塋嗚呼余與公同庠同舉鄉貢及進士凡

三十年聞政譽藉甚顧於詩未甚悉也比卧病公攜五  
言數首過予使訂可否余見其帖有法度及詢之則曰  
吾業此二十年誦唐詩千首每袖置一卷有遺忘輒取  
繹之今尚能誦焉所作五七言亦無慮千首然未始示  
人聞子論甚強余意後數日當盡攜以來過期不至忽  
報云死矣因取所留稿閱之慘然以悲又數日公弟錦  
衣千戶昂奉同年通政魯公克明狀以銘請予因以語  
昂俾輯遺稿俟異時次而傳之而先畀以銘銘曰生不

溺貴當力學以成旋棄其羸以保此令名胡取之難而  
而委之也輕乃以其餘自託於詩欲以是鳴志弗竟而  
止實傷我情有欲知公不於其詩其考我銘

明故監察御史張君墓誌銘

監察御史張君世用按福建時得疾還京師屢輟屢作  
猶力疾出治事今年春益劇乃具疏乞歸事下吏部未  
覆而君卒成化乙巳閏四月二十九日也年四十有九  
君屬續時謂其子立曰吾親年七十吾不及終養以死

死不恨獨歎此耳又謂其中表弟尚寶卿仲君惟馨屬所以識其葬者蓋謂予予往弔君聞遺言而哀之翌日奉君同年中書舍人楊君應寧狀來請銘余以維馨故識君久且得應寧狀可據信銘不得辭君姓張氏諱稷字世用世為揚之寶應人曾祖諱谷成祖仲仁父彥明封太常寺博士母鄭氏封孺人君少有器識弱冠為縣學生穎脫儕類御史見其文驚曰是當為場屋魁比試有司屢弗利成戊子始舉鄉貢壬辰登進士第觀政

戶部嘗預收京儲給河南潼關諸軍賞皆有能聲授太  
常博士凡值郊祀廟饗左右執事閑禮度有白金文綺  
之賜居數年被簡為四川道御史監光祿寺出納明慎  
及按福建樹風采嚴號令鋤強植弱敏於聽訟剖判曲  
直然未嘗恃以為能每錄重辟必勤服念所全活者甚  
衆有藩閫武臣怙勢為民病君列其罪奏疏之名益彰  
尤重文教以作人厲俗為事間又訪先賢遺跡興廢補  
敝存問其子若孫或弔古感物輒形歌詠亦不以妨政

務及受代簿牘無留者時官數多冗至有冒名匿罪以干祿澤君率同官極論之詔黜其尤者若干人君後別有擬奏而病已作竟不果上云君闇爽明達博交汎愛而臧否自別有不當意輒見辭色旋亦消釋不復著胸臆間憫窮赴急義氣所激視財利若土直在官十餘年不問生業未嘗增寸土一屋服器儉樸蕭然如諸生時君當經術授徒京師有顯者為詩文清拔有思致至於辨別體裁評隲高下尤介介不苟君子以為知言所著

有竹西稿若干卷娶許氏戶部檢校文誠之女封孺人  
一子某月某日葬某山之原銘曰入其堂其氣奮以揚  
接其人其論激以昂忽弗振而死能無傷乎

封承德郎刑部主事譚公墓誌銘

封刑部主事上海譚公自作壽藏於黃龍浦之西原又  
自制棺槨衾襚凡後事皆備會其子員外郎韶歸自官  
公日引至其地左右指曰墓穴當主何山墓門當何鄉  
地當置何樹池畜何魚田所宜種者何穀園所藝者何

物詔唯唯退而泣曰噫此殆以後事屬我也還朝而訃  
及公諱甫字廷禮世居上海鶴沙里年十六失怙出贅  
朱氏數歲乃歸養肄禮經舉子業志遊庠校不果府強  
辟為從事非其好也乃以經學授厥子曰必為我成之  
間家居置塾為鄉子弟師多所器就及謁選丞居野裁  
剴綜合見稱為才以外艱返載修塾教并繼母弟侃諤  
皆誨使成業焉納婦置產居之兄章裕先遺孤訓誨若  
已出潘氏妹勞無子迂歸養之改丞陽信專督馬馬政



簡裕不為力坐謗辭官詔舉鄉貢禮部試連得捷公曰  
吾不歸治家俾詔或內顧遷業豈至是哉于是益屏世  
營厭耳喧襍居浦西別墅築周垣鑿方池構屋數楹環  
蒔花竹日吟諷游衍以此自老及聞詔拜官昭以四戒  
謂急失情緩則留獄刻則妨平恕多疑則長奸偽因韻  
為詩使誦之詔子魁兒早夭公貽書曰非我不德則汝  
失刑是致不可不省詔勘獄高郵時法禁殊肅公又示  
以詩贈王事至重毋得枉道歸歸必請又一年乃用詔

例以省覲歸三晦朔亟趣使行然中實不釋疾且作詔  
遷令秩公力疾手書致戒蓋自是不復至矣或者謂公  
曠達遺世樂不諱死此世所不易或曰久於命殆安之  
爾彼戒子者意懇懇不釋斃然後已此豈遺世者哉君  
子曰後說蓋知公者公曾祖伯玉祖文政者克閏配某  
氏子二詔其長也次子誥舉懷才未仕孫男女各二皆  
幼公年六十有二某日薨詔之舉於鄉予得其文魁選  
間及在官廉慎精法律以公命奉姑養於官即所稱潘

氏妹者也詔以刑部郎中陳君一夔狀請銘一夔公鄉  
人有世好言蓋可據故為銘銘曰名弗身遠於子則取  
之公不曰矜曰我國有之生距有窮意邇斯止公不外  
慕曰此足以死死有遺憂其憂在國曰吾子有職於我  
是塞彼官弗忒以耀於潛德

封太孺人楊母熊氏墓誌銘

楊太孺人熊氏卒於新都其子行人司正春奔喪歸既  
闕地卜日具塋其孫翰林侍講廷和請予銘按楊氏之

先本楚人元末徙新都春之曾祖諱賢贊於李祖諱壽  
山考贈行人司正公諱孜皆冒李姓公三娶始郭繼楊  
太孺人以同邑望族實再繼焉時楊氏中落公為縣學  
生有前室二子遠政太孺人撫若已出及公膺貢入國  
學留居故廬手自織辟畜雞豚易錢谷為朝夕費裁取  
自給餘悉致京師為旅資公授永州吏目太孺人從歲  
所得祿奉務節縮一錢不妄費公卒於官遠政亦相繼  
天死春及二季皆幼未堪事太孺人蓬首垢面負遺骸

挈兩寡婦以歸值貴州苗作亂道甚梗晨夜間行出入營壘觸冒瘴癘雖造次頃刻區別臧獲咸有分限每經一堡必號曰天乎未亡人經某堡矣經一嶺必曰經某嶺矣以至城郭津渡皆然既抵家治塋家復貧如未仕時脫所被簪珥遣春就學始令復楊姓曰汝父治命也目嘗失明成化辛丑春舉進士疏乞歸省太孺人喜乃復明居數年趣春就任曰我尚健猶幸及汝之封也春拜行人司正以弘治辛亥滿三載吏部上最績獲賜勅

命贈官如其官太孺人始受封乃具冠帔拜祠堂曰未  
亡人有以見君地下矣某月日卒壽八十有三某月日  
塋於某山之原在公墓右數武許子五孫十廷和某某  
曾孫五銘必有狀司正君既歸追憶懿行懼外之人無  
能知勉自為狀其辭哀而理廷和年十二舉鄉貢其舉  
進士實先司正君今在講筵史局卓然有聞焉予嘗叙  
貞壽堂詩以徵太孺人之教與澤然所叙事差簡茲叙  
為銘作乃書之加詳若公行尚多以銘為太孺人作故

不及且與詩叙互見云銘曰有沃斯原我樹我封夫君  
所安我不圖存後四十年而寔於鄰異壙同垣疇其保  
之以遺我子孫

明故中憲大夫浙江處州府知府郭君廷臣墓  
誌銘

予聞浙藩張布政稱良有司得知處州府郭君廷臣及  
彭刑部南巡最君績移檄獎厲處人相與建生祠奉之  
未幾君卒其子鄉貢士郭方以憂居肥郵馳省君至杭

得訃奔至處處人曰我侯之子也相嚮而哭郭既返君  
喪道鎮江奉楊按察應寧狀上京師請予銘蓋其母之  
墓余實銘之矣郭君舉成化己丑進士官戶部為主事  
督收京儲會計精當尋督天津諸衛及汧石諸場財賦  
宿弊盡空屬吏以金餽斥弗納遷員外郎督儲臨清見  
伐桑棗貨食者畀之米且諭之曰植物不易貨且盡當  
復何貨民感悟遂不復伐會有議開邊者願君督餉辭  
不獲比出境不遇賊而還進郎中有宗室訟民田久不



決君往勘實歸奏稱旨因疏所見數事於朝及知處州  
守久闕倅貳更署吏緣為姦君至嚴防禁籍記條教事  
無留案尤精判決人不敢欺處有銀治民乘利據險為  
恒患君榜示禍福弗悛者輒捕除之嘗有羣盜久弗獲  
君憂而禱之是夜夢衛廉穀溢因廉得米廣者為盜窟  
併獲賊證衆以為神麗水民感後妻逐前室子君重傷  
子教反覆開悟俾為父子如初戒民節用禁胥吏勿下  
鄉井還逋民萬餘口復舊業歲旱禱雨雨輒應有蟲傷

禾稼為文祭之三日而死有瑞蓮嘉禾諸物或以頌君  
辭焉尤留意學校躬為程課士皆勸學獨嚴御下貪官  
黷吏皆斂不敢肆惠歸於民民以是思之君少用志教  
養弟息舉鄉貢懋惠皆習舉子嘗旅宿比舍有女夜奔  
拒之不去乃出避之其素所操執固如此豫策民利數  
十事及為郡次第行之處人輯所立教條曰為政紀綱  
曰括蒼規約以傳其所自述有詩文若干卷郭氏本出  
鹿邑國初魯祖仁美從大兵北行至肥鄉因家焉祖晟

龍江衛經歷父謙永年縣丞累封戶部員外郎今年八十矣母石氏累贈宜人君生某月日卒於某月日年五十有二娶梁氏累封宜人先卒葬某原己酉某月某日合窆郭其嫡子也側室楚氏有子邦丁氏有遺腹子郭告諸祠堂名之曰邠銘曰世有毀譽或非厥情面背則殊矧惟死生浙有郡侯郭姓忠名泣郡六年而棄其氓氓忘我侯侯我父兄劬孰我佚擾孰我寧泣以送之有淚吞聲侯也何知我情是嬰侯生有祠匪悅與營曷以

驗之於侯之門有考績者視我茲銘

需菴處士岳公墓誌銘

亡妻岳宜人之伯父需菴處士公諱端字元方實為吾  
外舅蒙泉翁季方之母兄卒且塋公子坪泣曰吾父之  
銘尚將誰屬哉東陽亦杖淚曰吾又奚辭因檢翁所撰  
述得公世系詢諸戚黨長老及坪所自述又追憶吾妻  
言得公事行并叙次之岳氏世為順天潮縣人曾祖諱  
德甫祖諱思銘考諱興懷遠將軍府軍前衛指揮同知

姚太淑人劉氏懷遠公始娶焉繼娶王劉娶於南京宣  
廟詢公家命舟迎至京師賜第居之懷遠公職秘甚近  
勸不顧私公孝友識理道少勤幹裕遠遊江湖服養成  
業翁賴以就學懷遠公從翁為翰林編修嘗具疏論國  
大事辭甚激公窺見其稿泣且裂曰安所置老母乎及  
翁入內閣論曹石罪惡得禍戍萬里外私第為世家所  
奪家盡破公則曰弟職然也未嘗色怨獨奉母日慰悅  
之終其身迨勢家敗公具自列憲廟命還故第翁出知

興化公獨居慨慕及見致政歸方聚處數年而翁卒遺業蕭然幸公老壽家賴以不墜遇王氏所生弟千戶詳從弟海皆極友愛育從子培均增室埴垣不異已出培子標再居官及諸孫桂格楨之立羣從中表諸女弟之嫁皆公力也族叔有餉邊者解所衣以贈之劉氏舅病卒買棺治殮乃歸白懷遠公旁近姻黨下至旅寓以貧告為治奩買棺者多不可紀數劉氏從母無子迎居母事三十年竟殮而葬之女適王主事證早寡撫育其女

擇貢士任經嫁之於今有孫焉家居不妄費不服紈綺  
雖老病躬課臧獲或手操箕箒不少倦自制棺槨及諸  
凡後事曰死命也吾俟其正而已弘治丁酉四月三日  
病忽草草坐而絕得壽七十九五月某日塋鄒之望村  
先墓配南京陸氏有賢行子坪克家孫梁女孫一人蓋  
自塋堂之失我蒙翁遂失嗣續且不壽以沒天下共悼  
惜之公後卒十有八年壽踰二紀有子及孫視翁福祉  
殆若過之其功在繼續方居顯揚亦畧稱矣然則公之

重以翁而亦可以無負也夫銘曰方以類聚習以性成  
古語則然於公有徵遠則畿甸尊則公卿孰不曰此蒙  
翁先生之兄也漢有陳氏元季並稱公與蒙翁將無忝  
厥名有嗣在公來者其承之

西莊處士羅君墓誌銘

西莊羅公連昌南城人處士也其子玘為翰林編修故  
大夫士多知公例得封勅不及命以卒鄉之人不敢字  
公故以號著曰西莊云公諱昌字文程生未晬失恃乳



弗給曰噉肉數嚮得不死竟以是得疾家人易之公考  
獨曰是將強吾宗顧以疾弗督使學一日公忽自奮從  
季父大觀學博涉史經地志歷法諸書未始圖畫然恒  
若以自負者人亦莫能測也正統間賊鄧茂七作亂聲  
言襲見昌城中人罔有固志公帥衆守西門不脫介胄  
示以固守力懲弛怠敵扑日不絕麾下士無敢仰視者  
忽流言將黥鄉兵軍中皆驚公叱曰敢譁者死衆乃定  
寇亦漸引去皆謝曰活我者羅公也村北芙蓉山傳有

金雞神能禍福人趨者踵接公曰寧有是敵以下皆答而返之竟以無他嘗夜過東麓見灌莽中鬼磷匝地比曉揮百斧赭之遂屋其上今家焉其意氣屹屹不苟為物變類此尤敦內行事父一日不離側祀事久益虔自撰墓莫親曰此禮非古吾以勸孝也晚居西莊置產增業為遊眺所亭臺竹樹甲旁邑諸墅日與客笑傲其間竟以是終所著有西莊稿家塾稿若干卷娶傅氏子男四綱紀經維紀改名玘以國子生舉京闈第一登進士

第拜令官公壽六十九某月某日塋縣之某原按羅氏  
出侍御史袍袍避危全諷跋扈徙居南城十一傳為魯  
大父慶遠生闕谿司稅俊傑俊傑生耕隱處士大矩實  
生公至公子玘乃復顯方其未顯也公謂之曰爾有奇  
才終必稱吾志比久詘言不為變已而果然玘舉京闈  
余實校其文故以公塋請予銘其同官陳正之有狀銘  
曰鬱而崛其氣有勃歛其鍰弗剋以缺礪以發亦莫我  
敢遏固天將成之匪予奪

國子生傅君墓誌銘

國子生清苑傅君卒於家時其子編修珪方闋母服再入翰林纔數月以冬至節謁陵未入見而訃至將復歸予甚傷之越數日珪奉檢討毛維之狀來請銘且曰吾母已得體齋傳先生銘吾父時以為慰茲吾父不過以歿先生倘予之銘是慰吾父地下蓋珪之舉於鄉予暨體齋典試事故其言云然余安可辭也哉按傳氏本清苑舊族族最大鄉稱所居地曰傅家莊曾祖諱士成祖

諱貴皆弗仕考諱信為高縣主簿有去思於民君諱秦  
字顯雅弱冠遊保定府學為生通詩經學成同業皆推  
孫稱後進遂屈為子弟執經問疑義者相繼君教法嚴  
整凡及門經指授多稱為才君自負甚偉始謂科第可  
立取也試京闈連失利失利者類以籍口曰君道科目  
果足恃哉成化己亥膺府貢士上禮部陞國子生又卒  
業歷營繕司事名齒銓籍次未及問乞歸假君曰我非  
不欲仕仕亦有命安能役志於物以累吾志乃自號抑

莊散人放情田野日與鄉人狎多蓄酒待客客至則詠  
觴為樂有措者亦忻然赴之性坦亮不喜談人過或犯  
之笑不與辨人以故樂觀之知君者謂雖自放然所負  
故在終必自見且其子珪已得進士官侍從即不就仕  
亦嘗倚有錫命是其進退優裕無弗可者而君遽以疾  
卒得年五十有六而已君喜為詩稿成亦輒棄去不復  
自惜每以教珪不獨於經學為然珪志業專確將大有  
就而君不及見然他日考試業者寧不曰無是父無是

子如楊子所云者亦可以無憾哉君配劉氏有內行其  
卒也以弘治庚戌葬府城南祖塋君卒以某月日明年  
某月某日啟壙而寔以劉氏祔焉子五珪乃其長孫如  
子之數女孫加女之一皆在室銘之曰士有力學奮為  
仕徒有車既膏中阮於塗塗亦孔夷衆所共趨我行獨  
起咎豈在車為疾者驅我車弗如有命我者孰疾孰徐  
我悉聽之弗能覲覲我力弗窮而委其餘勗我繼軌慎  
哉厥初

先叔父前金吾左衛百戶李公墓誌銘

我叔父府君病間東陽之間曰有憂乎曰汝在予何憂  
有遺言乎曰汝在予何言嗚呼東陽孱愚賴我叔父以  
有今日自吾父學士府君之喪實父事焉叔父老而無  
子我其敢弗力凡葬事悉稱吾父顧名秩未著不敢以  
銘誌為達者累謹茹哀輟哭叙其事以藏嗚呼吾李氏  
世出茶陵洪武初吾曾祖繼二府君籍義兵歷濟南衛  
改燕山左護衛吾祖允三府君在永樂初與靖難功授



小旗改金吾左衛尋入內局督工作正統間遭疾當代  
吾父欲棄學從事叔父年十六請行遂以書數受任器  
仗名籍奏牒辭式心計手錄雖宿吏老掾皆自以為不  
及然悉力勤事戴星觸霧或遠涉江漢未嘗告勦成化  
初以上洪恩擢所鎮撫久之遷百戶弘治初例罷官而  
冠服供事終其身內領家政一不煩吾父躬所營置必  
以供俯仰費及東陽所得祿俸並聽出納勺粟寸帛兩  
無嫌猜四十年餘凡三徙七婚九表賓祭餽贈禮至無

筭經制區析舉無遺憾其有勞於家又如此尤篤孝吾祖寢疾久扶掖甚至吾祖母陳宜人疾苦癰與吾父截葦筒吸之每談遺舊事至老猶相對泣下事吾母劉宜人及令母麻宜人莊不費禮張氏姑貧益甚養其夫子孫三世凡婚嫁視財利如土苴親黨中待以舉火者往往有之然實無厚積當其揮金赴急雖夜爨不給弗顧也是亦可謂難已初娶唐氏秀朗有內幹久不嗣內焦馬史三氏每得子輒不育長女唐出者嫁儀真衛指揮

同知張珏次出焦氏者嫁龍驤右衛副千戶王清皆蚤  
卒又次嫁府軍右衛副千戶張雄又嫁馬氏孤女於燕  
山左衛百戶喬峻叔父生宣德丙午五月二十五日沒  
弘治甲寅三月二十一日壽六十九歲視吾父猶不及  
一馬痛哉吾世墓自曾祖而下葬於城西畏吾村凡冢  
八唐叔母實在穆次四月二十六日東陽帥弟東溟男  
兆先輩治葬事墓去吾父所墓地三里而近東陽質居  
禮家謂宜合葬從祖不敢屈祔新城獨念吾父叔兄弟

之愛未始違朝夕而寃宥稍遠於情終不安嗚呼痛哉  
叔父諱澤字行潤不敢諱者為來世計也


兒兆同埋銘

兒兆同者予第二子太子太傅成國公朱公之外孫也  
生僅十歲而殤悲夫兒生於成化丙午予隱几東閣夢  
人抱送一男心訝曰安得至此六月九日以生辰避客  
入直乃於舊所夢處得先學士公報始悟曰顧不至此  
乎予謂其同物且有奇兆也遂名之兆同云兒骨相奇

聳目炯炯射人機穎驚脫五歲能作屬對語教之即應  
口成誦口占俚句類協聲韻字雖未素識亦能闇寫累  
數十筆不少誤至於篆體亦然余懼其洩露太早每為  
抑遏之然逸不自制則肆為諸幻戲剪刻描畫搏埴裝  
貼斂掣結縛百凡之事心得手應無事倣規而天真爛  
然超出意象即物計數毫分兩析皆畧合算法予亦怪  
之然弗能禁也弘治甲寅春兒病頭痛至冬愈劇右臂  
既萎猶能以左手貼梅花盈樹蓋自是始不獲作乙卯

二月五日竟死其母嘗曰兒幼頗肥何漸瘦兒應曰木  
葉向長則展而不積此何怪又自言吾愛朝景花草竟  
發禽蟲下上殊愜人意然不可全得午日一照則萎矣  
嗚呼孰謂斯言為終身之讖耶兒不擇服食獨自負使  
仇不下物間有所愛其母曰乞汝翁兒曰便乞無恥竟  
弗乞克其志殆無可以容之者其不克少見頭角以死  
正坐是哉造物者與人往往狎玩侮戲撓其志慮使不  
得其平不然有物如此曷不自秘惜徒費其技能而又

棄之又何益也予既思兒不置謂其有成人之志焉棺  
殮祭墓不忍殤視稍優其數以慰其有知者吾過矣吾  
過矣予以母命卜是月十八日帥其叔容之兄兆先塋  
兒都城西北小西門附於祖墓之側慟而為之銘銘曰  
孰夢我以祥孰畀汝以良而止於斯其生奚為噫吁  
孰知我悲



懷麓堂集卷五十